



BIBLIOTECA NAZ.  
Vittorio Emanuele III

XXIII


C

20

NAPOLI

XXIII

20





XXII!

C

20

26.  
HIERONYMI  
RORARI

EXLEGATI PONTIFICII,

*Quòd Animalia bruta ratione  
utantur melius Homine.*

LIBRI DVO.

*Cartusia Bonus*



*St. Martin. ost.*



PARISIIS,

Apud { SEBASTIANVM CRAMOISY,  
Regis & Reginae Regentis  
Architypographum: } viâ Ia-  
cobza, }  
ET } sub Ci-  
GABRIELEM CRAMOISY. } conis.


M. DC. XLVIII.  
CVM PRIVILEGIO REGIS.





3  
AMPLISSIMIS  
& integerrimis viris  
PETRO ET IACOBO  
PUTEANIS  
FRATRIBVS  
CLAVDII FILIIS.

GABRIEL NAVDÆVS S.P.D.

VM in procinctu es-  
sem ut ex Italia re-  
uerterer, in quam ve-  
stro, Clarissimi Pu-  
teani, munere, cum optimo  
S. R. E. Principe Ioanne Fran-  
cisco à Balneo decennium ante,  
profectus fueram; nescio quo ca-

A ij

## 4      EPISTOLA.

*su, sed optimo tamen, mihi que  
gratissimo contigit, ut in hunc  
Hieronymi Rorarij manuscrip-  
tum codicem inciderem. Et sa-  
ne cum viderem illum, non ser-  
mone modo, qui castigatus om-  
nino, nitidusque foret, sed pra-  
cellenti quadam sensuum digni-  
tate exaratum esse, existimaui  
propterea nihil me, aut voto meo  
iuuandi bonas artes, aut sapien-  
tum hominum desiderio conue-  
nientius facturum, quam si eum  
in Gallias mecum deferrem, &  
typographorum opera publica lu-  
ci, atque libertati vindicarem.  
Hoc autem dum in praesentia fa-  
cere contendo, ea quoque subiit.  
animum meum cogitatio, ut in  
procuranda illi magni nominis,*



## EPISTOLA. 5

*Et contestata auctoritatis tutela,  
à vobis, Nobilissimi Viri, non  
discederem, quos doctrina cultio-  
ris studium, incredibilis in lite-  
ratos omnes propensio, vite ur-  
banioris observatio, amicorum  
clientela, principum fauor, po-  
pulorum amor, omnia denique  
laudum & commendationum  
momenta, toti Europæ mirandos  
floris instar Gallia delibati, su-  
spiciendosque reddunt. Neque  
profectò vereor, ut ista de vobis  
predicatione fucum veritati fe-  
cisse videar, qui testes dictorum  
meorum habere possum viros il-  
los percelebres, omnique virtu-  
tum & gratiarum choro insigni-  
ter dotatos, quibus ab annis fer-  
me triginta, liber semper in*

*Museum vestrum patuit aditus : scilicet ut liberalis otij delitias in eo perciperent, & confabulationes simul miscerent, quibus non potest qui semel interfuit, se nullis unquam aut honestioribus, aut eruditioribus, aut etiam iucundioribus interfuisse, non fateri. Ad me certè quod attinet, ita sermonibus illis afficior, sic me suauissima vestra consuetudo rapit atque delectat; tam altè in mentem meam insinuat libertas illa Philosophica; tantùm denique mihi arridet, Academicorum vestrorum coniuncta cum incredibili doctrina, nobilitatisque opinione, modestia, ut*

*Si me fata meis paterentur*

ducere vitam

Arbitriis:

huic ego vite conditioni, quæ  
me à vobis nunquam diuelli pa-  
teretur, omnem aliam posthabe-  
re, quantumvis splendidam,  
& omni bonorum genere cumu-  
latam minimè dubitarem. Ve-  
rùm postquam mihi sors ita ce-  
cidit, ut quietis loco de longin-  
qua peregrinatione cogitandum  
sit, tum demum hanc ipsam mi-  
nori cum molestia aggrediar si  
Rorario viro certè nobilissimo  
& sapientissimo vices meas obi-  
re, vestris illis in congressibus  
quotidianis, concessum fuerit,  
eumque non secus ac meipsum  
loquentem audire, & comple-  
cti benevolentia vestra velitis.

A iiii

*Quemadmodum sanè vos pra-  
innata vestra in res omnes egre-  
gias, & minimè vulgares pro-  
pensione facturos esse nullus du-  
bitò. Dabam Parisiis v. Id.  
April. MDCXLV.*






*Reuerendissimo, ac Illustrissimo  
Domino D. ANTONIO,  
Episcopo Atrebatensi, Cæsareæ  
Maiestatis Consiliario.*

**S**CRIPSERAM libellos duos,  
in quibus ostenderam Animalia  
bruta sæpe ratione vti melius  
Homine; idque feceram, vt quorundam  
impudentiam, ane potiùs dementiam  
retunderem: qui maximi omnium Imperatorum  
Caroli Quinti splendorem intueri non  
valent. Quàm id perperam, declarat  
quod nunc gessit, bellum cum Germanis  
Deo & Principi suo rebellibus: in quo  
gerendo fatentur hostes ipsi virtutem  
bellicam, ærumnâsque omneis superasse,  
quas alij quotquot fuerunt, vix

adiisse si viuerent, gloriari possent. Qui verò ab ægritudine soluti, rem rectè perpendunt, meritò dignum iudicant, non qui Christiani duntaxat, verùm totius Orbis Imperium teneat: tantòque magis, quòd non libidine dominandi tractus, verùm sola pietate ductus, id bellum adortus est: vt perturbatæ Religioni Christianæ confuleret, & labenti Pontificiæ dignitati capitis sui periculo succurreret. Hos autem legendos ad te mitto, eruditissime Antistes, vt lætere illustrem parentem tuum, qui summis apud Cæsarem consiliis præest, non aliena mente fuisse ab hac gloriosissima expeditione capeffenda: quæ æternum eius Maiestati nomen pariet, nobis salutem extinctis communibus hostibus, qui publico commodo

aduersabantur, dum arma victricia  
 Turcis inferri prohibebant, dum  
 hæresibus fauebant, Turcis longè  
 infestioribus. Turcæ siquidem in  
 corpora sæuiunt, & corpora alio-  
 qui peritura; obstinatæ hereses im-  
 mortalibus animis nostris æternæ  
 mortis laqueos nectunt. Ex Por-  
 tu Naonis Calendis Martiis MD.  
 XXXVII.





Reuerendissimo, ac Illustrissimo Domino D. CHRISTOPHORO MADRVTIO Cardinali Episcopo, & Principi Tridentino ac Brixinensi.

**E**RAM, Illustrissime Princeps, paucis antè diebus : ubi de Casare sermo habebatur, & fuit doctissimus alioqui vir, qui diceret nescire quo odore olens Christianum orbem ditionis suæ facere niteretur. haberet in se saltem quo cum Othonibus, aut Federico Ænobarbo conferrì posset, mouit (fateor) mihi stomachum, dignum immortalitate Principem illis postponi : qui licet insignes fuerint, si tamen in vnum omnes congerantur, huius magnitudini non sufficiant. itaque in mentem mihi venit animalia bruta saepe ra-



tione uti melius Homine, idque duo-  
 bus libellis ostendi. quod quoniam ex  
 aliorum contentione magis, quàm ip-  
 sum per sese cognosci, atque intelligi po-  
 terat: coactus Hominum, & Bellua-  
 rum exempla contuli, in quibus re-  
 censendis nemo mihi prius, quàm sibi  
 succensuerit, memor haud agrè ferre  
 debere à me dicta quæ ipsum facere non  
 puduerit. Tibi verò nominique tuo di-  
 catos afferet Claudius filiorum meorum  
 natu secundus: cùm quia in his auun-  
 culi tui, amantissimi mei, sit mentio:  
 cui tu virtute ac dignitate successisti:  
 tum quòd filiolos meos sic institui cupio,  
 ut paternis vestigiis ambulantes, illius  
 defuncti memoriam colant, tui viuen-  
 tis servitutem serviant.







# HIERONYMI RORARII

*QVOD ANIMALIA BRVTA*

*sape ratione vtantur melius Homine.*

LIBER PRIMVS.



PROFICISCEBATVR Neapolim accitus à Carolo Quinto Bernardus Clesius Cardinalis Tridentinus, ob eximiam probitatem vtrique Cæsari, Carolo, & Ferdinando gratus; cum hoc, mihi vetus, & amoris plena intercedebat familiaritas; itaque cum priuatum negocium cum Cæsare haberem, non iniucundum comitem me dedi: perueneramus Velitras vigesimo ab vrbe lapide, ibi post cœnæ tempus, recreandi animi causa (& erat Cardinalis omnium horarum vir) admissus

Circitor, canem introduxit, qui per rotas exilire, variòsque motus ad nomina peragere didicerat, sed hæc & id genus cum aliis communia; illud singulare, quòd cum Circitor è sinu libellum extraheret musicis notis depictum, canis ad genùs exiliens, canentem sectabatur, voce nunc acuta, nunc graui, modò continuato spiritu in longum tracta, modò inflexo variata. Hæc spectantibus risum, mihi stuporem inducebant: tam docile animal, quòd ostensa meminisset, & quæ posset arte imitaretur, magnum, & admirabile; verùm etiam num admirabilius, quòd inter eorum cœtus, quos nunquam viderat, secerneret vel ludi, vel vini auidiusculum; nec aberraret vnquam; inesse profectò aliquid, quod in homine diuinum, in bruto nefas est dicere: quando quæsi physiognomon aliquis sciret hominum naturas noscere. Tunc Cardinalis in me conuersus, En, inquit, tibi Rorari, quem tu prædicas Bononiæ florere Arciuidam: scio, inquam, haud multum probare te, quæ soleo de Arciuida constanter affirmare: quæ plerisque omnibus nota, mihi quàm notissima sunt;

an

an negas quasdam homini notas affixisse Naturam, quædam lineamenta; quibus quid in nobis sit, quidve futurum; peritus coniiciat; nec solum hæc nostra; sed quæ nostratia sunt: celeres parentum, immaturos filiorum obitus, molles vel duros fortunæ successus. Ergo, inquit, verum esse in astronomicis statutis; quod tuus laudatus M. Manilius cecinit,

*Fata regunt orbem; certa stant omnia lege;*

*Longaque per varios signantur tempora cursus.*

*Nascentes morimur: finisque ab origine pendet.*

Immo, inquam, ab ea sententia, tam me veritas ipsa, quam religio nostra auocat; quippe si cogerent sidera; neque fures iure laqueo, neque homicidæ gladio plecterentur; rursus fato functi, male actæ vitæ pœnas iniquè subiremus: bene actæ præmia indignè adipisceremur. Quid ergo, inquit, hæ tuæ notæ, & lineæ afferunt? nempe inquam: quod apud Gellium disserit Phauorinus philosophus: qui siderum vim comparat excelso atque declivi monti, vnde si la-

pidem ieceris, isque rotundus fuerit, monte ad præcipitium inducente, ad ima labetur; contrà si quadratus fuerit, alicubi consistet, forma sua retardatus: non secus arbitratur hominem, etiam quòd Natura ad hoc agendum, ad illud patrandum inducat: non tamen cogere, quin ratione, quæ potissimum in homine imperat, ab iis abstinere queat, quæ infelicitatem afferre cognouerit. Dedit enim nobis summus rerum opifex, animi, cui corpus paret, liberas habenas; possuntque vitia, ex naturalibus causis orientia, voluntate, studio, disciplina extirpari, & funditus tolli; quod ita esse, ex illo Socrate constat, qui primus è cælo philosophiam deuocasse, & inter homines constituisse dicitur, cuius è facie cum Athenis in foro Zopyrus Arciuidæ haud dissimilis, multa probra notasset, & rideret quasi delirantem, audientium corona: risus compescuit Socrates, naturam asserens ad ea se genuisse: rationem, nequid istiusmodi admitteret, deterruisse. Hinc Stilponis sectatores magnæ laudi præceptoris suo tribuebant: quem ebriosum & mulierosum natura fecerat, & nemo tamen

ebrietatis, nemo libidinis vestigium in eo viderat. Cur, inquit, dixisti rationem, quæ potissimum in homine imperat? putasne rationem in belluis itidem inueniri? hæc inquã opinio diu me torfit, rationem sæpenumero melius in belluis, quàm in hominibus reperiri: nihilque prorsus nobis inesse, quod non iisdem natura largita sit: non dico vniuersa singulis, nam neque nobis omnia; hic prudens, ille simplex, & omnino rudis; hic laudis, & gloriæ cupidus, ille somno, & ignauix deditus,

*Dij immortales*, ait Comicus, *homo homini quid præstat:*

*Stulto intelligens.*

Inuenies etiam, quibus præter figuram oris nil hominis sit: quales apud vos Germaniæ Principes, qui istiusmodi monstris delectamini: quos diuinus Vates veriore vocabulo iumenta appellauit, quia parum ab eis distent. Huius autem sententiæ non ego auctor, sed Plutarchus Cheronæus, veruntamen hic auctor: vt qui eruditione, ingenio, exemplorum copia reliqua assequitur: id vnum (pace tanti viri dixerim) non consequatur: dum nostros in mores, no-

stramque naturam, inuehendi desiderio magis, quàm veritatis indagandæ ducitur: quid enim in rem facit, feras hominibus fortiores esse, quia sine dolo, sine fraude dimicent, præliisque potiùs immoriantur, quàm vt animum despondeant? aut temperatiores, quoniam Cornix nouem ætatibus vidua perseueret? hoc si quis pro comperto habeat, quod habere tam diuturno annorum curriculo non potest: fatebimur, à natura Cornici datum, vt amisso pari, alterum non admittat, ratione fieri negabimus; rursus in vulnera ruere, non est ratione vti, stolidum illud robur, non fortitudinem appellabimus. Nam cùm contemnendæ mortis varij modi sint, varij exitus: non omnes fortitudinis præclaro nomine dignabimur. Fortes non sunt, qui alicuius desiderij potiundi spe, priuati, aut calamitate oppressi, manus sibi intulerunt, qualis paucis annis antè Philippus Strossius opibus florens, literis non ineruditus, cætera felix, si sua sorte contentus, partibus aduersis non fauisset, de quibus intellexisse videtur Virgilius,

*Proxima deinde tenent mæsti loca: qui sibi lethum*



*Insontes peperere manu, lucemque perosi  
Proiecere animas; quàm vellent aethere in  
alto*

*Nunc & pauperiem, & duros perferre la-  
bores.*

Non etiam fortes, qui sapientiam ade-  
ptos se falsò putantes, eam extrema de-  
mentia denudarunt, qualis ille, Hora-  
tij,

*Deus immortalis haberi*

*Dum cupit Empedocles, ardentem frigi-  
dus Aetnam*

*Insiluit.*

Cuius stultitiae æmulus Antonino Vero  
imperante, apud Pisas Philosophus, ro-  
gum suis sibi manibus extruxit, in quem  
vivens, valensque insiliret; quicumque  
tale aliquid egerunt, intrepidè, non  
fortiter egisse dicuntur. Fortis fuit Lu-  
cretia Romana quæ vim passa, animum  
culpa, corpus peccato non liberauit:  
fortior ætate nostra superioris Panno-  
niæ nobilis Virgo, à Turca rapta, virgi-  
nitatis florem redemit, edocendi grami-  
nis pacto, cuius succo corpus impene-  
trabile redderetur, periculùmque fa-  
cturo, herba, quæ fortè obuenerat, de-

linitum iugulum, gladio metendum præbuit, mallens honesta morte occumbere, quàm contumeliam pati: fortes, qui pro salute patriæ mortem oppetiere; & ne in singulis laborem, fortes fuerunt quicum gloriæ alicuius spe mori, quàm cum futuri dedecoris suspicione, vivere maluerunt, quorum multa apud Græcos, non pauciora apud Romanos exempla suppetunt. Harum omnium fortitudinum expertes esse feras, credere libet; quis enim in brutis animalibus mortem contemnentium causas indaget? vna superest eorum, qui seruituti mortem præferunt, quo in genere, Feras excellere censet Plutarchus, & hominibus idcirco præstare, rectè, an perperam, aliorum iudicio relinquo; non enim eo pacto fortis fuisset Iulius Cæsar, non, qui nunc regnat, Franciscus Gallorum Rex, à piratis alter, alter ab Hîspanis in captiuitatem ductus, qui ambo non morte, sed auro à seruitute in libertatem se vindicarunt. Sequamur & nos tantorum Regum exempla, sequamur Homerum laudantem Vlyssæm certandi, & cùm opus fuerit, fugiendi peritum: nec belluas ista glo-

ria interim fraudemus; quin aduersus Plutarchi sententiam ostendamus, quæcunque homini extrinsecus eueniunt, belluis pariter accidere: præterquamquod alienæ gloriæ non inuident, non discordias serunt, non aliena felicitate macrescunt; vnde fit, vt multarum ægritudinum pondere liberatæ, acutiùs cernant, æquiùs perpendant, benigniùs sibi, & aliis consulant. Elephantes, qui reliquis robore præstant, non ad mortem obstinati perdurant, quin vincenti, terram, & verbenas in victoriæ confessionem, & seruitutis signum porrigunt. Cn. Pompeius, qui ob virtutem Magni cognomen meruit, Veneri victrici templum dedicaturus, viginti in Circum induxit elephantos, in quos Numidæ iacularentur; qui cum se telis impetiererent, nec fugæ spem superesse, ad preces versi inenarrabili habitu populi misericordiam implorauere; aduertis, non omnes belluas, neque semper, seruituti mortem præferre: & agnouisse preces, ac oblatam lamentationis speciem, ad impetrandam misericordiam valituras: quando nil mortalium magis proprium esse debet, quàm misereri, &

• parcere, quorum acta in cinerem rediguntur, cogitatus in auram evanescent. At non hæc à feris meditata ratio, illos à crudelitate auocauit: qui in vario, & nouo tormentorum genere delectati sunt: quique in vlciscendis, quibus iure, vel iniuria irascebantur, oculos pascere iactabant. Huius qui rerum apud Turcas potitur, atauus, si quos è captiuis, seruituti inutiles audisset: imperabat palo per posticum in intimum corpus adacto, in sublime erigi, & cibo, quem petiissent ali, vt diutius inter vitam, & mortem cruciarentur; & hic erat homo, qui ( vt ait Terentianus Chremes ) humani à se nihil alienum duceret. Turcam dices, & in hostes, at captiuos hostes, nec hic sæuiendi finis, idem in suos erat. Memoratur Bizantij in hortis, quos in delitiis habebat, cum tribus pueris ambulando, aduertisse citri pomum decerptum, quod in prima deambulatione pendere viderat, furtum negantibus, imperasse pectora diuidi, & nisi in primi, cui lethalis fors contigit, stomacho, pomum inuentum fuisset, idem erat reliquis duobus supplicium ferendum.

*Ira furor brevis est: animum rège: qui  
nisi paret,*

*Imperat, hunc franis, hunc tu compeſce  
catena.*

Quod aliud frænum, quæ alia catena defuerat, quàm ratio? ſed non rationis expertes leones ſunt, qui vbi iracundia premit, in viros potiùs, quàm in fœminas ſæuiunt: in infantes nunquam, niſi magna fame. Vitoldus Lituaniæ Dux, non ſubito furore iſtus, quin voluptate potiùs, (ſi quis modò tam barbarus, & tam immanis, qui voluptatem in atrociffima re capiat) quos capitali pœna dignos iudicaſſet, vrſorum pellibus incluſos, à veris vrſis lacerari iubebat; itaque audita quiſque damnatione ſua, laqueo, aut quouis alio mortis genere, vitam libentiùs finiebat. Fuit mihi Cracouiæ relatum, dum Pauli tertij oratorem agerem (horret animus dicere, & inuitus talia de illa natione refero, quæ præterquamquòd me ſummis honoribus affecit, & ampliffimis muneribus donatum dimiſit: ea morum ciuilitate præſtat, vt obliterato Satyrico carmine,

*Vltra Sauromatas libet hinc fugere:  
cum ipſa Italia contendat ) dicam ta-*

men: quando nec aurum sine fæce reperitur. Memorabant latronem fuisse ex iis, qui viatoribus insidiantur, qui seruantem gregem puellam adortus, cum ob ætatem virum ferre nequiret, indignatus non posse importunam libidinem explere, alterum pedem arbori deuinxerit, alterum equi posteriori pedi, laceramque duas in partes dimiserit, quos putas luctus, quas preces infelicem fudisse, & auersa tamen rationi hominis mens stetit. Leoni contra, obuia facta in syluis, captiua Getulix mulier, cum se supplicem exhibuisset, fœminam infirmam, profugam, indignam præda animantium omnium generosissimi, & qui cæteris imperaret, inoffensa discessit: & hos rationis expertes, illos participes esse dicemus? verum fuere barbari, fuere grassatores, innocentum sanguine pasci soliti: non barbarus, nec in syluis grassando, sed Italicus in vmbra, & deliciis viuendo educatus, Antonius Otho Montis Pheretrij Comes, puerum, quo à cubiculo utebatur, pice, atque sulphure perfuso linteo inuolutum, viuum ardere iussit, quia ad præfixam horam candelam non attulisset.

set, dignam mehercle causam, cur tam immaniter fureret! dignum Principem, qui alteram humani generis faciem Neronem imitaretur, qui cùm infano incendio, ex quatuordecim Urbis regionibus, vndecim absumpsisset, nec Populi Romani odium extinguere posset, vertit in infantes, mentitus auctores incendij, fuisse Christianæ religionis tunc pullulantis pios cultores, mandabatque ferarum tergis contactos, à canibus laniari, crucibus affigi, capite truncari: inter quos Petrum Apostolorum Principem, & Paulum illum electionis vas; alios suo Circensi ludicro addictos, quod habitum aurigæ indutus exercebat egregius Imperator, iubebat in luminis usum vri, & præbere lucem prætereuntibus; quos gloriosos Martyres, foedus Satyricus vitiorum doctor magis, quàm censor suo carmine perstrinxit,

*Pone Tigellinum tædæ luccbis in illa,  
Qua fontes ardent, & fixo gutture fu-  
mant.*

Fuit vlla fera truculentior Ecelino? qui quanquam atavum referebat Germanum; in Italia tamen natus, Patauino-

rum indigena, crudelitatem cum Phalaride certauit; aut qui eum superare etiam contendit, Ansidius Patavinæ urbis præfectus, ædificato in Citadellæ oppido carcere, quem eorum, quorum opes emungebat; quosque odio persequeretur, affinium, & amicorum turba replebat, nec nisi quater in anno purgari sinebat, non excrementis, non aliis immunditiis, non denique cadaueribus illorum, qui omnibus necessitatibus macerati, intolerando insuper fœtore conficiebantur; horum sub crudelissima tyrannide puberes mutilati, pueri concisi, virgines vitiatæ, matronis mammæ ademptæ, prægnantibus uteri extracti, partus flammis dati. Et ambigimus adhuc auferre rationem homini, & illam belluis dare. Gandauum Belgarum ciuitas, huius inuicti Imperatoris natale solum, Leonem alit generosis insignem iubis: Is oblatum in cibum paruulum canem non offendit modò, verum etiam conuiuium adhibuit; euenit semel, caueam mundantis incuriâ, ferreos cancellos recludi; egressus leo toti ciuitati terribilis fuit, succurrit eiusdem, qui culpam admiserat, solertia;



capto namque & auribus torto cane, ad dolentis vocem reuocauit leonem ætati opitulaturum, in quam homo tam crudeliter grassatur. Elephanti pari modo imbecillium curam gerunt: minùs valida pecudum occurrentia manu dimouent, nequid imprudenter obterant, nec nisi laceffiti nocent. Dices istos, quos recensuimus, singula sæuitiæ monstra fuisse; quid illa diritas ab vniuersis Taurisanis eodem Ecelino extincto repræsentata? sex eius fratris filij subito populi incurfu interfecti: vxor in frustra dissecta, filia viua in ignem coniecta. Non crudelia minùs, quæ Pisani generis Italici dedecus exercuere, ardente cum Florentinis bello, suspitione ducti Vgolini Gerardeschi exercitus Ductoris consensu, nonnulla castella amisisse; inflammante Archiepiscopo Rinerio, qui tumultus sedandi, & compescendæ iræ auctor esse debuerat: captum Ducem cum quatuor filiis, quorum nullus puerilem exuerat ætatem: turri, quæ nunc etiam famis cognomen seruat, incluserunt: proiectisque in flumen clauibus, sæuissimo omnium supplicio vitam finire coëgerunt: quid paruuli merue-

rant, etiam si pater proditoris reus con-  
uictus fuisset? à cuius ætatis iniuria irata  
bellua abstinet: itaque minimè mirum,  
si iusta Dei vindicta, qui terra, qui ma-  
ri, longè latèque imperitabant, ne qui-  
dem vlnam ditionis tenent, cunctis exe-  
crabiles facti. Potest venia Reip. Vene-  
tæ dari eorum quæ in Ducem suum Pe-  
trum Candianum egerunt, nulla quip-  
pe Reip. crudelitatem magis aspernata,  
& quod tunc fecit, superbi dominatus  
odio, & recuperandæ libertatis deside-  
rio fecit, coniecta in domum flamma,  
deturbatum trucidarunt, filium infan-  
tem in nutricis gremio iugularunt, am-  
borum corpora ad macellum canibus  
lanianda proiecerunt, documentum da-  
turi, ne quis futuris sæculis opprimen-  
dæ Reip. suæ auctor existeret. Bocchus  
Rex in triginta elephantos sæuire de-  
creuerat, stipitibusque alligatis totidem  
alios immisit, & qui stimulis irritarent,  
nunquam inducere potuit alienæ vt in-  
iuriæ ministri fierent. At Rauennates  
sponte sua in Lemigium Exarchum ex-  
arserunt, quem non contenti trucidaf-  
se, vxorem, & pellices ad stuprum vul-  
garunt, Exarchanos Iudices publico

consilio interemerunt, eorum familias ludibrio habuit populi multitudo, quæ semper nimium aut odit, aut amat. His addam Caroli septimi Gallorum Regis Marescalcum, qui magica vanitate delectatus, centum & viginti mulierum prægnantium secuit vteros; & Abecillensem Cauponam illam, quæ iugulabat infantes, & sale conditos in cibum hospitibus dabat. Profectò qui carmina condidit, quibus pueri à primo limine instituuntur, cæterum præceptis philosophiæ plena, cum sapienter omnia, tum illud sapientissimè protulit:

*Cum tibi proponas animalia cuncta timere,*

*Vnum præcipio tibi plus hominem esse timendum.*

Regnante Ferdinando Catholico Rege, Helisabeth coniux æterna memoria digna virago, ad claustrum secesserat in quo Leones Valentix publicâ impensâ aluntur; inter eas quæ Reginam comitabantur virgines, erat adolescentula forma egregia, sed petulans moribus: quam deperibat illius vrbis in primis clarus Emanuel, cui res præclarè cœpta Leonis cognomen postea dedit. Ea tran-

fennæ innixa , vnde leones spectabantur : è chirothecis alteram demisit, inuitato ad recuperandum amante : Iuuenis subeundæ ignominiaæ metu ( & sunt Hispani huiusmodi qui vitam pro laude paciscantur ) euaginato gladio , læuæque iniecto paludamento , caueam recludi iussit , in ipsóque vestibulo genua flectens, rectà ad leonem iuit : & porrecta cuspide chirothecam sustulit, versaque in leonem facie retrocedens , eundem honorè in limine exhibuit , immoto persistenti , & audaciam viri fortè miranti ; ad puellam inde perueniens data chirotheca, malam manu percussit, caperet scortillum , & memoria teneret non ampliùs virum morti obiicere : in alterutro rationem fuisse dices ? in procaci ne virgine , quæ fidum amantem certæ morti obiiciebat ? an in iuvene , qui stultum honorem , vitæ securitati præferebat ? in leone nimirum : qui humilem , nullam vim inferentem respexit ; & illos tamen , qui feris sæpe truculentiores sunt , ab humanitate homines appellabimus ? has , quæ non nisi prouocatæ , aut fame virgente nocent , à feritate feras dicemus ? Elephantes  
 ho-

homini in solitudine erranti obuij facti,  
clementes, & placidi viam demonstrant,  
illiúsque cuius conspectum vestigium  
riment, itineris duces, & comites fiunt.  
Quælibet sæuitia, quilibet impetus ca-  
num; mitigatur ab homine residente hu-  
mi; hominum verò rabies, ne à mortuo  
quidem inimico sedatur: hinc aiunt  
apud Romanos inuentum, vt cadauera  
cremarentur; quoniam quorundam in-  
sania in ea quoque sæuiret, sepulta cor-  
pora eruendo, & feris lanianda præben-  
do. Atque vtinam illa tantum in gente  
malorum dæmonum cultui dedita, is  
furor quieuiſſet, & non ad nos, qui pu-  
ram, atque veram religionem colimus,  
perueniſſet; quid autem ad nos, immo  
ad illos qui summi Dei vicem in terris  
gerunt, pudet dicere, quod illos non  
puduit facere. Stephanus Sextus For-  
mosum Prædeceſſorem suum mor-  
tuum erui fecit, & astantibus; qui ad ce-  
lebrandum Concilium venerant; pon-  
ticalibus exuto indumentis, manus  
abscidit, abscissas in Tiberim proiecit,  
omnique dedecore affectum cadauer;  
in loco non sancto sepelire iussit. Non  
fuerat satis Pontificem vnum adeò ve-

cordi dementia insaniisse; nisi Sergius tertius alieni odij minister, eiusdem furoris contagione, in eundem Pontificem debaccharetur; è tumultu iterum extractum, in foro Romano capite truncari, & in amnem proiici iussit. Verùm quid antiqua, & obsoleta repetimus? Is qui nunc viuit, Henricus Angliæ Rex, aliam super aliam vxorem ducendi libidine cæcus, post innumeras patratas cædes, inter quas Roffensis, & Morus duo illa doctrinarum lumina extincta, dux illæ Catholicæ fidei firmissimæ columnæ euersæ; nonne diui Thomæ Cantuariensis, cuius natalem diem celebrat Ecclesia, cadauer effossum, non secus quàm si viueret, citari, & coràm fisci fecit? aduersus Martyrem Christi dicebat testimonium, aurum, quo solido condita erat ara, dicebant gemmæ, quæ auro inclusæ radiabant. Quamobrem, qui alterius Tyranni triste iudicium pro Christi fide subierat: thesauri reus ne istius quidem sententiam euitare potuit, cremati beati cineres in auras spargi iussi sunt. Atqui huiusce extremæ dementiae furiis non priùs agitatus is Rex, quàm Lutheranis hæresibus se

possidendum penitus tradidit ; dignus  
alioqui , omni regia virtute conspicuus ;  
& qui doctum , & apprimè Christianum  
libellum scripserat , aduersus idem il-  
lud , quod nunc profitetur dogma : adeò  
præcipites eunt , qui à veræ fidei cultu  
aberrantes , pessum semel ire cœperunt !  
Delphini sui generis defunctum effe-  
runt , ne ab aliis piscibus laceretur , & id  
curant de sensu iam carente ; nos ratio-  
nis capaciores erimus , qui istiusmodi  
insaniæ plena patramus ? Vedius Pollio  
Romanus eques , non odio , sed cruentâ  
voluptate allectus , damnata mancipia  
in Murenarum viuariis mergebat , non  
quòd in vsum distrahendi terrarum fe-  
ræ non sufficerent , verùm quòd volu-  
ptates videndi viuentem hominem ad  
extremum laniari in illis , adamaret ; & is  
Pollio ex amicis Augusti numeratur ,  
Augusti inter Diuos relati , qui si huma-  
nitatis micam , nedum Diuinitatis in se  
habuisset , nunquam talis monstri fami-  
liaritatem adamasset . Verùm enim uerò  
quid miramur iustitiæ terminos semel  
egressum , totum se nequitia possiden-  
dum tradidisse ? illo , illo nempe proscri-  
ptionis die , quo non vidit Sol scelera-

tiorem; inter sicarios efferauerat animum ita, vt cui per flagitium, adeptæ tyrannidis fundamenta debebat; quem ipse Parentem, quem liber Populus Romanus, patriæ patrem dixerat: eundem obtruncari passus sit, obtruncatîque caput inter præcisas manus, in rostris poni: vbi ille consul, vbi sæpe consularis eo ipso anno aduersus sceleratum Antonium, quantum nulla eloquentiæ vox; auditus fuerat, in quo Phalarides omnes deus iste superauit. Quòd si Iustitia reliquarum virtutum Regina, sic à Principe violata, & à Principe inter Deos stolidè relato, cur non à belluis cultam, venerabundi exosculabimur? Narrant Ægyptij Aspidem ad cuiusdam mensam accedere solitam, micisque & cæteris esculentis pasci; enixa catulos, ab eorum vno, nondum per ætatem rationis compote, nondum accepti beneficij gnaro, hospitis filium interemptum offendit, in satisfactionem catulo necem intulit, nec in eam domum ampliùs est reuersa; potest maior in homine iustitia reperiri? cui non sat fuit, filium necasse, nisi seipsa exilio mulcicaret. Quid aliud detinuit Bocchi



Regis elephantos, ne alienæ iniuriæ ministerio fungerentur, quàm quòd iniquum censebant in sui generis belluas fœuire? quod homo auaritia sæpiùs, quàm iniuria laceffitùs toties exercet. Hæc iustitiæ pars à quadam animi celsitudine manat: quæ tanta in belluis reperitur, vt sæpe parem in homine desideremus. Leo venatorem, qui telum sine vulnere miserit sternit, non vulnerat, ceu ignauum & indignum, in quem vlciscatur. Alexandri Macedonis equus regio ornatu stratus sessorem alium admittebat neminem; idem in Thebarum oppugnatione saucius, in alium equum transire Alexandrum minimè passus est; quamobrem mortuo duxit exequias, & tumulum vrbe circundedit. Idem de Cæsaris Dictatoris equo perhibent, alium prorsus sessorem dedignante. Equi vnius laudi duo summi Imperatores testimonium subscripsere; Augustus tumulum condidit, Germanicus præclarum carmen cecinit. Agri-  
genti multorum equorum tumulis adiectæ pyramides, arguunt, clarissimos viros non vsque adeo insaniisse, vt honores, qui homini debentur, belluis re-

merè soluerent. Impudens censebor, si his immiscuero, quæ de quodam meo possum; veruntamen, quoniam de equis, non de hominibus sermo; venia dabitur. Fungebar legatione Clementis septimi apud Ferdinandum Romanorum Regem, vtebárque equo: quem quoties ascendissem, toties occurrebat illud Virgilianum,

*Stare loconefcit, micat auribus, & tremat artus.*

Adieramus oppidum in Quadis (quos Slesitas vocant) Georgij Marchionis Brandiburgensis illius, qui à Catholica fide, in errores Lutheranos abiit: nunciarent ab equo turpiter læsum cui equorum custodia commissâ fuerat, & cum nuncio-aderat ipse quasi alter Deiphobus, truncatis naribus, querebatur Falcum id sibi fecisse, falcum (vt nosti) giluum Germani appellant, tantò magis miratus, quod ne calcitrandi quidem, nedum mordendi reus vnquam fuerat; asserebat famulus, postquàm eo vti cœpissem, tantopere superbire, vt ferre nequiret alteri priùs, quàm sibi potum præberi; in angulo stanti situlam se primùm obtulisse, inclinato inde sub

tigillo capite, quo stationes equorum separantur, ad ipsum ex ordine accedentem, mordicus prehensum: iussi deinceps antiquum vectorem meum parari, pro quo inter familiares contentio fuerat, vnoquoque illum detrectante, non alia ratione, quàm quod cæteris minor, pernix alioqui, & non indecorus. Cæterùm familiaribus utebar Germanis, quibus magnitudo magis, quàm species cordi: mirum quanta repente mutatio, qui velut ætate consenuisset (vnum quippe de viginti annis vsus fueram) flaccidis auribus tristis incedebat: me in dorsum recepto, alacer hinnire, superbos gressus glomerare, vt iudicaret familiares, eatenus indignatum à Domino ad seruitia reiectum fuisse. Parentem generositatem sibi vindicant reliquæ quadrupedes. Alexandro Macedoni dono dederat inusitatæ magnitudinis canem, Albanix Rex, imperauit Alexander apros, & vrsos emitti, immobili iacente cane; offensus tanti corporis segnitie, generosi spiritus Imperator, occidi iussit; nunciauit hoc fama Albano Regi, quare alterum mittens, monuit, ne in minùs sæuis experiretur,

sed in leone, & elephanto; duos sibi  
fuisse, hoc interempto non fore ter-  
tium, nec distulit Alexander, leonem-  
que fractum extemplo vidit; mox ele-  
phantum, haud alio magis spectacu-  
lo delectatus: siquidem horrentibus  
per totum corpus villis, ingenti latra-  
tu intonuit, mox in ceruicem insiliens,  
& inde belluam artifice dimicatione,  
qua maximè opus esset, infestans, cre-  
bra vertigine tandem afflixit; hæc ani-  
mi celsitudo, non potest sine magno  
laudis adipiscendæ, ruborisque & igno-  
minia euitandæ intellectu consistere.  
Cuius rei, non dubium argumentum  
dedit in exercitu Antiochi elephas;  
non audebat, qui dux agminis erat,  
amnem ingredi imbribus auctum, &  
turbidum; edixit Rex, qui transisset,  
eius principatum fore: confestim è gre-  
ge ausus quispiam, honoris cupidine  
tactus: quamobrem argenteis phaleris,  
quibus maximè gaudent, principatû-  
que donatus est, notatus infamia, cibo  
abstinuit, inediaque consumptus, mor-  
tem ignominia præferens. Leones vr-  
gente qualibet magna canum, & venan-  
tum turba, in campis, ubi conspici pos-

sunt, contemptim resistentes cedunt, ne formidine perculsi fugere videantur: at ubi virgulta, sylvasque penetraverint, celerrimo cursu feruntur, non amplius turpitudinis suspicionem adesse putantes: in hac parte aliquorum hominum ignominiam non de- regam, ne illustrium quorundam memoriam offendam: qui hoste imminente cubiculis inclusi, aut in castris inermes capi maluerunt, quam se pugnae cum gloria committere; & horum alij habenas regni tenent, alij Reipub. suae principatum sortiti sunt. Memorantur equi in Claudij Cæsaris secularibus ludis, excusso auriga, nihilominus palmam obtinuisse, peractoque legitimo cursu, ad metam stetisse, ut puderet homines vincendi desiderio, & arte, ab equis vinci: In ludis quoque Circensibus, ac si auriga staret, equi cucurrerunt in Capitolium ter sedem lustrantes, ut gloriari etiam viderentur lustrandi ritum non auxisse, non diminuisse. Proponunt victori equo præmium Veneti, qua die Patauium à Carrarensium tyrannide liberarunt, mittuntur vindi-

que pernices equi; solitus erat Franciscus Gonzaga nouissimus Mantuæ Marchio, duos mittere, nec erat alius, qui omnis generis equorum, & pulchritudine, & numero magis abundaret; dabatur currendi signum extra portam sanctæ Crucis, quæ non obliquo, ut nunc, sed recto patebat exitu, finiebatur cursus ante Bouis ædes in quibus ius ciuile legebatur, nunc confuso ordine, omnibus disciplinis liberalibus loca statuta; in prato vallis stabant tubicines qui præteruolantium equorum primo, proximóque animum buccina dabant: duorum alter, quos Marchionem mittere solitum diximus, fessorem non ferebat: ubi primum currendi spatium corripuisset, insidentis pueri lacertum leni morfu prehendebat, & puer assueti moris gnarus, in partem desiliens, vacuum dorsum linquebat, equus à recto cursu non aberrans, ad metam properabat, victor semper; nec vlnam ultra excessisset. Memini iuxta secundam, quæ tunc erat porta, nunc ea mœnia solo æquata iacent, vidisse senem à porticu in alteram transire parantem, cum inclamasset turba, aduentantium equo-

rum aspectu, titubanti rediret, an pergeret, interuenisse equum nimbo persimilem, impetúque strato sene, corruisse simul: constiterant ibi tubicines, & præteruolantem secundum, bombo animabant, resiliuit à casu equus, & præteriens eum, qui primus euaserat, palmam nihilominus obtinuit; tanta erat adipiscendæ laudis cupido. Domesticis libenter vtor exemplis quibus fidem obstringere possum, & alicuius amantissimi mei memoriam recolere. Viuente Maximiliano Cæsare utebar equo cuius exactæ iam ætatis superius mentionem feci: extra Enipontem animi recreandi causa equitabam cum Eugenio Cypri Principe illo frugi qui à Turca Præfecto Bossinæ fide prius datâ, cum tota familia est interfectus; patenti in campo ceruos pascentes reperiebamus, quorum incolumitas regio edicto capitali pœna cauta fuerat; equus procul visis ceruis, decertandi studio, ceu venaticus canis, ad cursum accendebatur; accidit semel duos velocissimo cursu insequenti, ad extremam cuiusdam prati ripam deuenire, quæ præcipiti quinque pedum altitudine humilior

prato iungebatur; nequiueram pernici  
cursu abreptus, dirupram rupem ad per  
pendiculum inspicere; nec si vidissem,  
sic subitò solutum in cursum equum,  
frænis cohibere; ab alto defilientes cer  
uos infecutus; non æquauit modò, ve  
rùm etiam inter vtrumque volans, inui  
cem disiunxit. Huius generosæ gloriæ  
non item Alites expertes sunt. Aquilæ  
implumes pullos suos alis percutientes,  
cogunt aduersos Solis radios intueri;  
conniuentem vti degenerem è nido  
præcipitant; optimum nobis documen  
tum tradentes, vt degeneres filios citiùs  
abiiciamus, quàm vt segnitie sorde  
scant. Eadem laudis ambitione inflatus  
Pauo gemmantem expandit caudam  
contrahens in vnum pennarum oculos,  
quos aduerso Sole in primis spectari  
gaudet, intelligens prorsus sic colores  
fulgentiùs radiare, sic vmbre quosdam  
repercussus cæteris quæri; qui in opaco  
clariùs micent. Certant Luscinæ ani  
mosa inter se cantus contentione, vi  
cta sæpe vitam morte finit, spiritu priùs  
deficiente quàm cantu; quo magis dam  
nandi homines, quorum animi non ef  
feruntur laudibus, non incenduntur ad



studia, gloria. Inest & Columbis laudis intellectus, norunt suos colores, & fibimet plaudentes vario volatu cælum fulcant, vnde fit vt in ipsa gloria gaudentes, sæpenumero rapiat earum occultus hostis Accipiter. Qui laude, vel gloria tanguntur pudore affici par est; quocirca Elephantes victoris vocem fugiunt, nec nisi in abdito coeunt, nec prius in aliorum numerum redeunt, quàm se flumine proluerint; cuius rei tam parvus inter homines pudor vt eius vel meminisse pudeat. Nil vilius Afinis, & parituræ tamen lucem cuitant, ne conspiciantur ab homine. Equabus tonsa iuba extinguitur libido, quòd pudeat sine coma esse. Idem Pauones amissa cum foliis arborum cauda, pudibundi latebras quærunt, donec iterum cum flore renascatur: ad idem spectant gallinacci Galli, victi occultantur, & silent, ægrè seruitium patientes: in victoria voce, & cantu exultant, se principes esse testantes. Hæc cum dicerem, subrisit Cardinalis, plurimum, inquit, mihi belluas debere, quas ab innata feritate vindicare, & hominibus mitiores (si Deo placet) redde-

rem ; non fortitudinem interim adimens, quin ita concedens, vt mortem contemnere, & vbi visum fuerit, temporis seruire norint ; laudis porro, gloriæ, ruboris intellectum, quæ summi Philosophi vti à ratione, non à natura prouenientia solis hominibus reseruauerunt, sic feris communicarem, vt rationis plusquam participes redderem: quin & Iustitiæ cultum, qualis seuerior forsitan, iustior in homine non reperitur: cum sæpe summum ius summa sit iniuria, an tu ( inquit ) dubitas si vera sunt, quæ de Aspide narrant Ægyptij: non omnia humanæ iustitiæ exempla aut superasse, aut æquasse? L. Brutus Romanæ libertatis conditor, duos adolescentis liberos virgis cædi, & securi percuti fecit; quia cum Tarquiniis consensissent in excidium patriæ, quæ nobis vitæ charior esse debet; accedebat iustæ vlciscendi causæ priuatus dolor, non habendi pro filiis illos, qui pro patre non habuissent eum, qui genuerat. L. itidem Manlius filium, qui Consulare imperium neglexerat, morte multauit, durum istud; poterat mitius exemplum in improuidum adolescentem, & cui-

tandi dedecoris, atque adipiscendæ laudis cupidum edi, sed erat Lucij filius: cui atrox ingenium, Imperiosi cognomen dederat; nec tam disciplinæ militaris, & Consularis imperij violati cura accendebatur, quàm quòd se in eo contemptum, & dedecore affectum dolebat, itaque militibus suis odio; iuuentuti Romanæ tota vita execrabilis vixit. L. quoque Virginius non poterat alia via filiam à vi, ab impudicitia eripere; quid autem simile in Aspide? nullus ibi priuatus dolor, nulla disciplinæ violata maiestas, nulla necessitas, nihil denique quod animum à recto impediret, iustissima duntaxat hospitis vindex facta: qui tam bene de ea meruerat, cui non satis visum homicidam filium interemisse, nisi sibi domus illius, vnde victus suppetebat, exilium indiceret. Doceas autem oportet, feras eadem charitate suos liberos amplecti, quā nos nostros solemus, dein gratitudinis, atque ingratitudinis vim sentire, tunc demum res acta, fide, atque miraculo digna censebitur. Vtrumque inquam, perfacile, est enim charitas creatis omnibus dispertita, quippe quæ nil aliud

est, quàm amoris nomen, & quidem  
gratuiti. Deus ipse, qui nulla re egens  
nobis consulit; & nostra causa producit  
omnia, charitas est, cuius exemplo pa-  
rentum erga filios amor, charitas dici-  
tur; alioqui si parentes sua causa dilige-  
rent filios, quemadmodum solemus ar-  
ua, prata, pecudum greges, non chari-  
tas, sed mercatura quædam esset. In-  
fundit autem Diuina bonitas charitatis  
sue igniculos omnibus, vt diximus, à se  
creatis, sine quibus animantium vita  
consistere non posset, cessaret defensio,  
cuius iniuriæ obnoxij paruuli defere-  
rentur si cessaret charitas; hinc fit vt no-  
bis hominibus nullius incolumitas sua-  
uior sit, quàm filiorum; nullum funus  
acerbius, & magis luctuosum. Eiusdem  
mentis, eiusdem animi se faterentur a-  
lites, atque quadrupedes, si loqui pos-  
sent; re autem ipsa declarant per fer-  
rum, per flammam intrepidè videntes, si  
filiorum charitas postulet: foeta Leæna  
pro catulis dimicans, in terram oculo-  
rum aciem defigit, ne venabulorum  
terrore à defensione amoueatur: fami-  
liares hæ nostræ Gallinulæ innoxæ,  
simplices, inermes, aduersus ipsum ho-  
minem,

minem, eadem ratione audent, & insurgunt, nullumque prorsus tam imbecillum animal quod omni pauore abiecto pro suorum catulorum, siue pullo-  
rum defensione mortem non paciscatur. Est igitur hæc charitas & naturalis, & necessaria; naturalis, quoniam à natura data: necessaria, quia sine eà mortalium vita non potest subsistere: at filiorum erga parentes amor, non charitas, sed pietas dicitur, non quidem necessaria: quoniam absque ea parentes degere possunt; naturalis tamen, natura quippe nos docet illorum grata mente meminisse, quibus vitam hanc, quam viuimus, quibus lucem, qua fruimur, quibus (vt vno verbo complectar) debemus omnia: hæc pietas tanti est, vt non iniuria dictum à sapiente fuerit, solo vultu pietatem lædi. Quamobrem ferunt Romulum in condendis legibus, & tota acta vita prudentissimum, nulla parricidæ pœna definita, homicidium omne parricidium nuncupasse, quòd impium hoc, illud impossibile factu iudicaret: hunc secutus Solon, qui regnante Tarquinio Prisco leges Atheniensium ciuitati præ-

scripsit, interrogatus, cur nullum supplicium constitueret in eum, qui parentem interfecisset, respondit id facturum putare neminem, nec sancire oportere quod antea commissum non fuerit, ne tam prohibere, quàm admonere videretur. Quod tamen consilium irritum fecit vnus item & alterius nostræ ætatis nefanda impietas, bis eodem anno visum in exiguo oppido Vincentini agri Marostica, filium patrem interimere; quod sceleratum scelus Vrbs amplissima Roma sexcentis postquàm condita fuerat annis non vidit; vtrumque nouimus, & alterum quidem egregium ciuem, si talem pestem sibi, ac patriæ labe non genuisset: nec id subito furore fecit, sed animo quieto; vlla si quies in tanto flagitio dici, fingi potest; neque rursus graui iniuria affectus, quamquam nulla tanta iniuria, cur mortem inferret illi, pro quo mori ipsum si res postulet iura diuina atque humana cogunt; quin leui de causa, neque dictu digna, extra mœnia cum amico ambulantem adortus, cùm pater filium precaretur, vitam tantisper linqueret, donec peccata fatendo dilueret: non priùs

impium expleuit animum, quàm tribus, & viginti confossum vulneribus reliquit, è quibus multa mortuo, sensûque carenti illata: & exorauit (vt à nobis dictum est) leonem, cui tanta feritas, mulier; pater filium exorare non potuit. Fuere certè sapientiores Romuli posterì, qui scientes nihil adeò sanctum, quod non violaret audacia: in parricidas singulare supplicium excogitauerunt, in culeum namque insui voluerunt, & in flumen abiici, ne si feris obicerentur, iis immanioribus uteremur, quæ tantum scelus attigissent: aut si nudos in flumen deiecissent, in mare delati polluerent ipsum, quo cætera polluta expiari putabant. Sic qui necasset illum vnde ipse natus esset, carebat meritò rebus omnibus, ex quibus oriuntur omnia; viuebat dum poterat, animam de cælo minimè ducens, moriebatur, nec terra illius ossa tegebatur, iactabatur fluctibus, nunquam ut ablueretur. Solæ omnium animantium Viperæ memorantur tarditatis impatientes, genitricis latera perrumpere; at pietatis multa belluarum officia recensere possumus: Glires senescentes

genitores suos summa pietate alunt: Meropes reconditos pascunt: Ciconiæ quoque senecta fessos educant: est & quædam belluis erga seniores obseruantia. Elephantis, qui ætate præierit, agmini præficiunt: qui ætate proximus fuerit eum agmen claudere iubent. Delphinis est curæ, ut iuniores grandior, tanquam custos comitetur, est & illis quædam alia pietas, ut sui generis mortuos efferant, ne ab alio piscium genere lanientur. Eadem Formicis tam paruo, tam nulli animali cura. Equi comperti sunt effusis lachrymis mortuos dominos lugere: interfecto Nicomede Rege, equus eius inedia vitam finiuit, quod & ætate nostra Scanderbecij egregij, & inuicti aduersus Turcas Ducis, equus fecit. Confecto plagis à latronibus domino, canes à cadauere non recessere, feras, & volucres abigentes. Testantur Romani annales cum ex causa Neronis Germanici filij animaduerneretur in T. Sabinum, & eius seruos: vnus ex seruis canem à carcere abigi nequiuisset, non à corpore ad Gemonias scalas abiecto, mæstos edentem vlulatus, cui cum quidam panis fru-



stum obieciſſet, ad defuncti os protinus  
detuliſſe, cadauere inde vnco in Tibe-  
rim tracto, in medium flumen innataſſe,  
ne mergeretur ſuſtinere tentantem, ef-  
fuſa populi multitudine ad ſpectandam  
animalis pietatem. Iſonis Lycij obtrun-  
cati, canis cibum capere noluit, inediâ-  
que conſumptus eſt. Lyſimachi quoque  
Regis, & Hieronis illius perpetui Roma-  
ni nominis amici, & focij, canes extinctis  
dominis ſe in rogos & flammas præcipi-  
tauêre. Cogita tute nunc, ſi memoratæ  
bellux folius conſuetudinis cauſa adeò  
perditè dilexerunt, vt poſt eos viuere  
recuſarint, quo amore, qua charitate  
ex ſe genitos proſequantur. Antepoſuit  
ergo naturali affectui, iuſtitix cultum  
Aſpis illa, pluris fecit iniuriam illa-  
tam, quàm ex ſe geniti catuli vitam,  
pluris ingratitudeſſimam admiſſam, quàm  
ſui, ſuorumque victui neceſſaria. Nam  
quòd gratitudinis, & ingratitudeſſimæ,  
vim pariter ſentiant, nihil mirum:  
cùm ex eodem pietatis fonte ambæ  
manant, diuerſis quanquam riuulis,  
in vnum tamen ſæpiſſime confluen-  
tes. Volumus eſſe grati erga Deum,  
cui omnia debemus; volumus erga pa-

rentes, qui nos genuere, genitos educarunt, educatos virtute donarunt, gratitudinis cum pietate iunctæ nomen assequimur: volumus erga fratres, quorum amore atque concordia non solum rem domesticam tuemur, verum etiam augemus, & ex minima sæpe in immensam prouehimus, quod ita esse, hoc tuum septem baculorum fasciculi delatum insigne monstrat, quando septem germani fratres vnanimis viuentes, familiam vestram nobilem licet, ad has tamen opes, & dignitatis excelsos gradus extulistis. Volumus esse grati erga consanguineos, affines, amicos, quorum opibus fulcimur, excitamur monitis, nondum relata gratia pietatis nomen adipiscimur. Celebris est apud Seston urbem Aquilæ gloria, à virgine educata gratiam referebat, aues, cæterosque venatus aggerens: gratitudinem superauit pietas, defuncta quippe puella, & in rogam coniecta, in ardentem flammam se pariter coniecit, simulque conflagrauit. In Achaïa puer Draconem enutrierat, adultumque metuens in solitudinem tulerat; accidit eundem puerum adultum in eodem sal-

tu à latronibus circumueneri; cognita implorantis auxilium voce subuenit Draco, & à latronibus eripuit. Cuidam Samio naue in Africam delato, & in lit-  
tus exposito occurrit Leo, quo viso per-  
territus arborem conscendit; sed neque  
fera cùm posset obsistere, fugienti in-  
stabat, quin sub arbore procumbens,  
hiatu, quo terruerat, miserationem  
quærebat; ossis frustum validiore mor-  
sibus inhæserat, & cùm ob id pasci  
non posset, inedia simul ac dolore cru-  
ciabatur, quo cognito Samius fidentior  
redditus, ab arbore descendit, præben-  
tisque os fragmentum ossis euulsit: libe-  
ratus leo quamdiu nauis in littore stetit,  
gratiam retulit, venationis partem quo-  
tidie afferendo. Deciderant Pantheræ  
in foueam catuli; recuperandi, nisi ho-  
minis manu spes nullâ supererat: occu-  
pato triuio iacebat alicuius aduentum  
obseruans: sic improuisa cuidam iter  
agenti affuit, blandiēsq; & se con-  
flictans mœrore, qui etiam in Panthera  
intelligi poterat: leui vnguuium iniectu,  
non reluctantem duxit ad foueam: co-  
gnita doloris causa catulos exemit via-  
tor; salutisque suæ mercedem accepit

prosequente fera lata, ac gestiente, donec solitudinem securus euasit. Innumera sunt gratitudinis in belluis exempla: utinam non tot ingratitudinis, aut multo plura in hominibus reperirentur: quotus enim quisque Princeps, qui non hoc vitio laboret? quàm pauci privatorum parietes, qui non hac labe inquinati fœteant: nullum est vitium quod non in ingrato Dæmone inueniatur, qui pulchrior & excelsior cunctis à Deo creatis ingrati animi crimine in intimum barathrum est detrusus: mea quidem sententia istiusmodi homines adeò sunt execrabiles, ut odio dignos arbitret, qui illorum duntaxat meminerint, nedum ut facta explicent, quando absque extrema indignatione & odio recenseri non possunt: debebunt igitur quanquam inuiti gratias silentio tantisper dissimulari. Rectè, inquit Cardinalis, nec ego alia de re magis glorior, quàm quum dignitatem, opes, quæcunque mea sunt, Ferdinando clementissimo Regi accepta refero; & eidem vni debere apud omnes profiteor: quin vitam si pro eius, liberorumque amplitudine effudero, nondum sa-

risfecisse credam. Sed vnde nouerat Leo, aut Panthera auxiliatrices homini manus esse, vt non ad alia animalia æque vt ad hominem confugeret? Vnde, inquam, Elephas animaduerso humano vestigio contremiscit? subsistit ab olfactu? circumspicit? nec illud vestigium calcat? sed erutum proximo videndum tradit, ille tertio, donec ad nouissimum ventum fuerit: tum demum ceu communicato consilio, aciem circumagunt, ac dirigunt: Quis monuit, vt timere debeat vestigium nunquam antea visum? etenim syluas, quas inhabitant elephanti, ab hominibus frequentari minimè credendum. Quis itidem docuit Tigridem viso hominis vestigio, pauore percuti, ex temploque transferre catulos? quæ quidem Tigris ipsius elephanti vestigia negligit: hæc est nimirum vis, hæc naturæ maiestas, vt hominem, cuius potestati, ingenio, prudentiæ, arti, cuncta subiecit Deus: exiguum corpore, formidet belluarum maxima: viribus imbecillum, robustissima: cursu tardum velocissima: quem igitur officere posse, & se etiam subigere intelligit; cur non

eundem prodesse, atque auxiliari posse sperare debeat? hinc, aiunt Syracusanum quendam iter in Syria facientem, Leonem obuium habuisse, qui sublatum anteriorem pedem humilis, atque supplex offerret, respicientem Syracusanum vidisse pedem infixam spinam intumuisse, itaque cruciatu illum, se metu liberasse. At non naturæ, sed rationi ascribendum, quòd Ceruus simplicissimum alioqui animal, urgente vi canum, vltro ad hominem confugit, & in pariendo semitas humanis vestigiis tritas, minùs cauet, quàm quæ secretæ feris opportunæ sunt: futurum præuidens, ut ab feris catuli lanientur, ab homine in delitiis seruentur; Pari modo, quæ de Panthera diximus: monstraue- rat natura vnum sibi auxiliari posse hominem: docuerat ratio triuium magis, quàm tramitem frequentari: nec moraturam diu, quin illac aliquis transiret; rursus humi decumbere, ne si longius prospecta fuisset, terrorem, & fugam iniiceret. Cuniculis natura dedit maribus, ut inuentos catulos suos nudos deuorent, eaque causa fodiunt terram, foeminae ut in abscondito pariant:

quin etiam, ratio suasisit foeminis sibi met  
pilos dentibus vellere, quibus nudos  
operiant, maritis suaseræ non ampliùs  
cibo opportunos esse. Cæterùm, vt  
reuertar vnde digressus sum, fidem,  
hoc est amorem seruare, & desiderium  
insuper vlciscendi, si opus fuerit, de se  
benemeritos; magnâ sibi prorsus & pie-  
tatis, & gratitudinis partem vindicant:  
quale de Antiochi Regis Equo legitur:  
qui recepto in dorsum domini interfe-  
ctore, frânis domitis, cum eo in præru-  
pta abiit: cui rei fidem faciunt, quæ ap-  
ud Maximilianum Cæsarem contige-  
re. Venerat Nurembergam ex Beth-  
leem Iudææ, venerabilis senex non ex  
vulgo mendicus, sed qui innata erga  
Deum pietate, beatorum Apostolorum  
limina visere cuperet; eius aduentu au-  
dito, Cæsar hominem vocari, & intro-  
mitti iussit. Non fuit quippe benignior,  
neque comior, neque prudentior Prin-  
ceps, & qui plura scire ac discere cupe-  
ret. Quæ idcirco tibi commemoro,  
quòd tu nunquam illò Principe vsus es,  
nam (ni fallor) vbi primùm per ætatem  
licuit, Bononiam concessisti Pontificio  
iuri operam daturus; reuersus eodem

anno Tyrolensis Regiminis Cancellarius, & Tridentinus Antistes electus es, nec inde priùs recessisti, quàm dignus immortalitate Princeps, extremum diem clausit. Quintu, inquit Cardinalis, rem quàm gratissimam feceris, si vbi se obtulerit occasio, eius memineris; cuius ego memoriam non minùs colo, quàm hos viuentes nepotes eius, veneror. Morem inquam, tibi geram, nec est cuiusquam recordatio, quæ me magis delectet; quàm æterni Imperatoris humanitatem, clementiam, liberalitatem, & cæteras animi, corporisque singulares, & eximias dotes recolere. Venatum iturus (nam venandi studio plusquàm modico tenebatur, non tam Xenophontis pædiam secutus, quàm quòd videbat, eo pacto humillimo cuique accessum ad se dari, quibus imprimis consulere cupiebat) solitus erat dicere, qui Princeps venatione non delectaretur, ei aut ludo tempus terendum (quod esset in homine, nedum in Rege turpe) aut alienis fortunis inhian- dum; vel (quod longè detestabilius) vxoribus insidiandum: maximarum porro rerum gerendarum negotia non



omitti, iussis quibus à secretis vteretur, ponè sequi; sic corpus citra alienam iniuriam exerceri, sic adeundi locum vnicuique dari. Laborabat nouissimis, quibus vixit annis, altera tibia, eaque causa lectica frequens utebatur, & commodius allocuturis futurum, puerum paruulo admodum equo ponè vehi iubebat, tantisper cum adeunte permutaturum, dum ore ad os, quod aiunt, quæ dicenda forent loqueretur, tanta inerat benignitas! Quoties aduerti in me, meique similibus solitum iubere, vt pileo caput tegeremus, ne Sole, ne vento offenderemur; quod item in principibus viris non faciebat, fortè ne quod singulari cuidam humanitati ascribendum erat; id illi dignationi suæ ineptè ascriberent. Erat & animaduersione dignum, quemadmodum inopes pagos, & tenuia castella, iter agendo libentiùs peteret, cum vt iis vsui esset, tum vt incommoditate loci proceres, quibus alibi locorum aditus paruisset, ab occupandis humiliorum hospitiiis arcerentur. Non omitтам, quod rarò in alio Principe, aut nunquam fuisse reor; externorum accedebat nemo,

quem non munificentia complecteretur: incumbibat id onus Paulo Oberstainer Præposito Viennensi ob singularem fidem, probitatem, mirè grato, quem isti vestri, qui optimum Principem Ferdinandum sibi prædæ proposuerunt, ob easdem virtutes inuisum aspernantur: is ubi negotium absolvisset, nunciabat quantum ad se attineret, rem peractam, iret ad thesaurarium reliquum habiturus: Thesaurarius perpen-  
sa hominis conditione, itineris, temporis quod absumpserat: tantum exhibebat, quantum expensis factis, & futuro in patriam reditui largè sufficeret; id-  
que humilioris etiam fortunæ viris tribuebatur; Germanos excipio, quibus nihil suppeditabat, vel quia maiore quadam dilectione exteris, & præsertim Italis afficiebatur; vel quòd propria in patria existentibus minùs congruere iudicabat. Nunquam aliqua ex vrbe, in qua diutiùs moratus fuisset, abibat, quin præciperet aduenarum nomina descripta afferri, quibus vt se sequerentur, donec petita sua absoluerent, singulis quæ satis esse iuebantur ad centum vsque & ducentos Rhenenses aureos a-

scribebat, illumque libellum, siue pagina foret ; Statum vocabant. Non hinc maiestatem, quæ inerat vultui ; non decoram pulchritudinem corporis, non equitandi peritiam, non rei militaris scientiam commemoro; non singularem prudentiam, qua nepotes suos ad hanc tantam magnitudinem Imperij, quæ terrarum pene orbi formidolosa existit: venturos prævidit, & fundamenta iecisse, si viueret, gloriari posset. Verum ut ad Bethleemitam redeam ; mandaue- rat Iacobo Bannissio, quo ( ut optimè nosti ) non prudentiore, probiorève à secretis utebatur, curaret decem aureos Bethleemitæ dari, qui se sequeretur: accepta quæ destinata fuerat, pecunia, cuidam Germano pediti sodalicio se iunxit, qui visam Bethleemitæ datam pecuniolam plurisfaciens, quàm hominis vitam, hominis senis, hominis adeò peregrè in nostras vsque regiones profecti; sylvas ingressus, quæ Nurembergensem ciuitatem cingunt, incautum hominem obtruncat, & cadauer tumulo tegit. Tenebatur eius desiderio Cæsar, causatusque thesaurarij negligentiam, & literis, & nunciis Beth-

leemitam dimitti iubebat : cognito iam pridem accepta pecunia discessisse ; suspicatus quod euenerat ; imperat Profosso, ( sic enim ni fallor, Præfectum Iustitiæ appellatis ) de Bethleemita anquirat , aut certò sciat pœnam in se redituram : is erat præterquam suopte ingenio diligens , cui furor plus , quàm ratio obuersaretur animo , dum regionem , dum saltus omnes sollicitus pererrat ; diuertit ad cauponem forte fortuna , cuius in hospitio idem ille sicarius , hora pomeridiana sedebat ad mensam pane , caseo , & vino horam de hora trudens : assidebat lateri canis , qui Bethleemitam fuerat , per tam longa terrarum spatia è Syria in Germaniam profecutus. Mos est ( ut scis ) illa in gente intranti poculum offerre , etiam humiliores , & aggrestes nobilioribus solent : itaque cùm Profosso cyathum obtulisset , ille forsan iracundia feruens , quia nullum patratæ cædis vestigium inueniret , auersatus inuitantem , quid tu , ait , mihi poculum propinas ? hoc audito Canis in latronis faciem insiluit , cuius rei stupore captus Profossus , ad increpantis vocem , canem mordicus prehendisse illum , à quo pascere.

pasceretur : nimirum , ait , Bethleemitam occidisti , vecors redditus , factum non dissimulauit ; cūque ad patratæ cædis locum duceretur , præcurrens canis , tantillum chlamidis detexit ; quin ad supplicium secutus , ablato latroni capite , multas blanditias lictori offudit , nec ab eius contubernio amplius recessit. Quid hîc primum mirabimur ? tantūne sensum , tantam rationem ( non enim aliter dicere possumus ) in illo cane fuisse ? qui secum meditaretur , si domini interfectorem nequaquam auersatus foret , euenturum vt incideret in aliquem , qui dignosceret Bethleemitæ canem fuisse ? an rursus , quòd audita increpantis voce in faciem insiluerit ? quo palam fieret causam subesse , cur offerenti cibum iniuriaretur ? quid quod ad tumultum præcurrens , cadaueris veste tracta facinus nudauit ? adde supplicium comitatum , adde blanditias interfecti domini vindici lictori exhibitas : huiusce rei , quæ meo quidem iudicio , vetera superat exempla , fidei , & cuiusdam præsciaæ futuri rationis in bellua , testimonium perhibere potest Petrus Bonomus Episcopus Tergestinus , qui adhuc viuit ,

E

sexturn, & nonagesimum annum agens; felix omnino, in quem ea gratia diuinitus influxit, ut qui Federico tertio Romano Imperatori gratus, idem Ferdinando pronepoti gratior inseruierit: & viuat sic omnibus sensibus integris, ut prudens ille, qui in viridioræ ætate floruit animus, idem propè in hac senili, & decrepita vigeat: quod temporis legendis sacris auctoribus, quod suauissimis amicorum colloquiis superest, id venationibus, aucupiiis, piscationibus absumentis, magnum prorsus desiderium iis qui nouère relinquens, eiusmodi Deo, & hominibus gratam ætatem transigendi. Verùm ut quæcœpimus, pergamus, ecquo nunc in homine tantam fidem inuenies? quin quanto intimi familiares magis, quanto beneficia plura adepti; tanto hi diligentius exquiruntur de se bene meritorum carnifices futuri. Vigeat Italiæ gloria, & militiæ decus Ioannes Franciscus Maria Urbini Dux, cuius incomparabili virtuti nullus non subscribebat Princeps: quis alius inuentus, qui alienæ inuidiæ minister tantum lumen veneno extingueret, quàm quo tonsore utebatur? in quem ingen-

tia contulerat beneficia : sed Deus iustus iudex pœnam in auctorem vertit, ut trucidatus, insepultus, volucribus & feris esca iaceret : cui non sat fuerat tantum vulnus inflixisse Reipub. Christianæ laboranti, & hac tempestate magis quàm vnquam talis propugnatoris præsidio egenti, nisi missus ad sollicitandum in Christianos Turcam, egregiam sumeret prouinciam. Addam vnum adhuc ne prolixior sim, fidei exemplum in Cane, & singulari cuidam prudentiæ iunctum. Mihi familiaritate per quàm iunctus erat Ioannes Maurus Archanus Foroiuliensis, felix ingenio iuuenis, is à secretis aderat Alexandro Cardinali Cæsarino : si quod negotiis tempus, si quod literarum studiis intercepisset, totum id venationibus impendebat; contigit semel, ut fugacem Ceruum sectando, in altam foueam decideret, ut sunt pleræque in agro Romano alicuius veteris monumenti relicta vestigia : aderat præter canem nemo, qui domum reuersus, cuncta mæsto vlulatu replebat, repetensque cursus, atque recursus, familiaribus ut se sectarentur innuere videbatur; quam rem

animaduertens Cardinalis, cognito nondum eius dominum domum reuertisse, iniunxit ut canem sequerentur, à quo rectà ad puteum deducti, altero crure debilitatum extraxere, dignum cui fata longiorem vitam darent, nam paulò post acuta febre correptus interiit. Si memoratus canis naturam ducem secutus duntaxat fuisset, quid ampliùs egisset, quàm à domino minimè recedere? adde plus aliquid: lamentis locum repleisset; monstrauit ratio domum redire, & voce, & quibus poterat nutibus auxilium poscere. Si tantus, inquit Cardinalis, belluis intellectus, sciunt etiam quid in se boni sit: propter quod sæpissimè petuntur: sciunt, inquam, & in hoc homini præstant, nam si sciret homo, quid in se boni sit, non se ocio, atque socordix corrumpendum dederet. Sciunt Elephantes propter dentes à venatore quaeri, eaque de causa venatoribus è suis obiciunt, quibus minimi sunt, ne tanti futurum prælium æstimetur: & si fessi ultra se tueri non valent, impactos arbori dentes frangunt, contentum ea præda venatorem abiturum rati. Ponti-



ci, qui dicuntur Fibri: urgente periculo se castrant, gnari ob id quæri, Castoreum Medici vocant; euomunt quoque fel ad diuersa medicamenta utile, item coagulum ad comitiales morbos, propter quæ singula inuaduntur. Eodem spectat Anguim, & Stellionum malignitas, exutam senectam deuorant præripientes comitali morbo remedia. Cerui annua deposituri cornua in loca aspera, & inaccessa secedunt, scientes dextrum cornu medicamento præditum, quod inueniri negant, magisque mirum, ne in viuarijs quidem: in quibus nihilominus mutant, vnde ortum adagium de re difficili, & non credenda, vt dicatur illic actum, vbi Cerui abiciunt cornua. Norunt Herinacei tergoris causa peti, norunt etiam propter aculeos non facile comprehendi posse; idcirco vbi venantem sensere, contracto ore pedibusque, & omni inferiore parte, qua raram, & innocuam lanuginem habent, conuoluuntur in pilam, quin etiam vrina spargunt, quados illa tergoris corrumpitur: verum hoc inuiti faciunt, & non nisi in nouissima desperatione: vt subtractos fuga

priùs fermè captiuitas occupet, quàm vt spinosam cutem maleficio perfundant. Conchæ, quibus innascuntur margaritæ, tam procul à cæterorum animantium sensibus: si viderint appropinquantem, comprimunt se, & opes suas operiunt, non ignaræ propter illas quæri: quin manum, si præuenerint, abscindunt, nulla iustiore pœna: quando parum est in gulam maria condere: nisi inter fluctus, & scopulos, periculo vitæ ad luxum quoque vestiamur. Cæterum quid miramur animalia scire cur, & qua ratione petantur? cùm non minùs cætera, quæ in rem suam faciunt, meliùs propè quàm homo intelligant, & nocitura vitent. Elephanti vno tantùm dente vtuntur radices fodiendo, moles impellendo, alterius mucroni parcunt, ne ad futuram dimicationem hebetetur. Sentiunt idem Pardi, Pantheræ, Leones, quippe qui condito in corporis vagina vnguium mucrone, ne refringatur, ingrediuntur. Cerui audito canum latratu, secunda aura fugiunt, vt relictæ in puluere vestigia cum ipsis abeant: Leones in fuga, cauda delent. Hæc futuri præuidentia, quonam pacto sine ra-

tione constabit: cùm nocitura, & profutura æquè perpendant? Memorabilis in hanc rem Draconis cum Elephanto pugna, æstu flagrante, allectus Draco frigidissimo Elephanti sanguine, in tantam altitudinem ascendere diffidens, in excelsam arborem repit, & in pascen-tem inde se iaculatur; quærit Elephas contra Draconis nexus, arborum, aut rupium attritum: hoc futurum prævidens Draco, gressus illigat cauda, ille nodos manu resolvit: Draco caput in nares condens, spiritum præcludit, & molliissimas partes lacerat, modò obuius factus inaduersum erigitur, oculos maximè petens; vnde fit, vt plerumque cæci Elephantes fame, & mœroris tabe conficiantur. Quæ rursus cognitio, an ne prudentia Pantheræ? quæ intelligens sui odore quadrupedes mirè sollicitari, easdémque capitis toruitate ter-rieri, occultato capite, odoris dulcedine captas corripit. Pari modo Cerastes, quibus eminent cornicula, occultato corpore, cornuum motu sollicitant a-ues. Ichneumones in dimicatione cum serpentibus ituri, se limo sæpius mergunt, siccantque Sole, & vbi se pluri-

bus coriis armauerint, in pugnam prodeunt. Neque solum armis se munire, verum etiam hostium tela norunt, norunt occasiones, norunt imbelles dissidentium partes. Idem Apri sapiunt, venatorem timentes vestigia palude confundunt, fugam vrina leuant; & libidine stimulante inter se dimicaturi, arborum attritu tergus durant, & luto alio atque alio linientes, exsiccantésque armanantur. Delphini agnoscentes hosti suo Crocodilo dorsi cutem plusquam inuitam esse, ventristenuem, & plusquam mollem, mergunt se, aluúmque subeunt aculeata dorsi spina, ventris molitiem secant. Norunt prorsus animalia, quæ sibi conducant, quæ officiant hosti: idque non natura, sed ratione dictante: natura namque præsentia quæ bona sunt appetere, aut quæ mala euitare docet: ratio futura præuidere, & consulere. Sepiæ, atque Loligines atramento, quod pro sanguine habent, aquam infuscant, ne possint à piscatore cerni. Polypi concharum auidissimi sunt, quæ cum visu, atque omni alio sensu præterquam cibi, & periculi careant, ad tactum comprimuntur,

eorumque brachia præcidentes, ex prædatore escam capiunt: quam rem futuram prævidentes Polypi lapillos extra corpus immittunt, ne palpitatu eiician-  
tur, tuncque demum securi extrahunt carnes. Agnoscunt Columbæ diuersas accipitrum species, alios non nisi ex terra auem rapere, alios circa arborem volitantem, alios sedentem in sublimi, alios volantem in aperto; visis ergo hostibus, vel confidunt, vel subuolant, contra naturam eorum sibi auxiliantes. Percurramus obsecro latius in hac parte animalium ingenia, atque solertiam: & quæ potest esse maior, quàm Hyenæ? quæ vomitum hominis simulat, sollicitans canes, quos inuadat: quid quum addiscit pastorum nomina? imitatæque vocem humanam, foras euocat, quem laceret? simili fraude Crocutæ & Mantichora vocem hominum, atque pecorum imitantur. Aquilæ determinant venandi spatia: nec vnquam in propinquo prædantur, futuræ necessitati prospicientes, nec rapta statim ferunt, quin primò librant pondus, ne fortè ubi minùs voluerint, deponere cogantur; quanta

verò futuri prouidentia, cum ceruis dimicaturæ, crebra prius volutatione puluerem colligunt, inde superuolantes cornibus insident, concussisque alis collectum puluerem in oculos offundunt; quis vnquam dicat naturæ non rationis opus hoc esse? puluerem colligere, collectum in oculos offundere, vt cæcutescentes è rupe præcipitentur: quid quum cibum è testudine capiunt? durissima earum testa prohibet, nonne præuidet, si in sublime ferant, & ab alto in durius aliquod decidere sinant, fore, vt frangatur? quæ fors interemit Æschylum poëtam. Ab eadem ratione doctæ Cornices, duritiæ nucis rostro repugnante, in altum volantes tollunt, inque saxa, in tegulas iaciunt iterum, atque iterum, donec quassatam frangant: omittamus quæsitam, & inuentam frangendi artem; quanquam miratu dignam; quam primo iactu non frangerint: eam confidere secundo, aut tertio iactu fractum iri debere. Verum quis dixit durissimo cortici nucleum subesse? natura monstrat cibum querere, veruntamen cibum, qui in aperto sit; hoc & Pici Martij faciunt, vt reddito per-

cussæ arboris sonitu , cibum inesse intelligant. Quale illud Corui ingenium? qui sitibundus nulla in propinquo comperita aqua , cùm in situlam monumenti pluissè cerneret : nec auderet in situlam descendere : visus est lapides congerere in tantam altitudinem , quæ portaturo sufficeret. Ascribamus ( si placet ) naturæ : ascribamus necessitati , quæ rationi ascribenda sunt ; dicamúsque illam , Deam à Poëta dictam , cui cæteri Dij succumbunt , ingeniosas vel alites , vel quadrupedes in his facere , quæ potus , quæ cibi sunt : etiámne Gallinæ , sicuti naturali quodam instinctu pullos quum excluderint , pennis , ne frigore lædantur fouent ? sic à natura , non ratione ductæ , aduersus flagrantis Solis intemperiem , corporis sui umbram opponunt ? quid quæ aliò , quàm ad vitam spectant ? Attestabatur Mutianus ter Consul , vidissè in prætenui ponte , ab utraque ripa duas Capras aduersas incedere , in medio pontis obuiæ factæ , dum vlteriùs progredi nequirent ; nec pontis gracilitas daret , vt circumagerentur , ad hoc subterfluens rapidus amnis in exilitate cæca , retro cundi , longo præ-

fertim spatio deterreret , procubuisse alteram , locum super gradiendi alteri dando. Idem aiebat , Puteolis vidisse Elephantos , qui de naui egredi cogebantur ; territos interuallo pontis procul à continente porrecti ; auersos incedere , quò se oculorum aspectu fallerent. Vulpes congelatam aquam transituræ , aure apposita , gelu crassitudinem coniectant , vt sciant quàm sufficiat ponderi. Equorum ingenia iaculantes experiuntur , difficiles conatus corpore ipsóque nixu imitantium , intellectuque adhortationis , & gloriæ fatentium. Cuinam parti dabo , quæ de quodam paruulo meo Cane referam ? cuius de me sollicitudinem referebant familiares , nunquam aliquò proficisci contingere , quin septem perpetuos dies mœrore confectus , cibo abstineret : hic in aula opperiente me Pompeio Richerio egregio ciue , dum vestem in disco positam , dum alibi chirothecas in scamno custodire vellet , ambulanti vestem versus , ad vestem decurrebat , rursus ad chirothecas eadem sedulitate remeabat , donec in diuersa cursitando fessus , suo labori consuluit,



chirothecas dentibus prehensas ad vestem deferendo. Hunc in Germania natus: quo tempore apud Ferdinandum Regem Clementis Septimi oratorem agebam, & erat mecum Onophrius Rorarius sanguine iunctus, eximia probitate iunctior, qui canonicas mecum orabat, quas dicunt, horas: advertebam canem non prius loco moveri, quam orandi fine facto, beatæ Virgini dicatam salutationem dici audisset; tunc surgere, tunc blanditias quàm maximas ferere; mirabar qua ratione sciret orandi finem factum, suspicabarque non aliunde coniectare, quàm quòd eam salutationem genu nixi dicimus, & erat nihilominus dignum, actum illum advertere, & meminisse: periculum facturus, iubebam postridie sub lectuli culcitra abscondi, tamdiu sopitus manebat, donec eadem salutationis verba proferri audisset: tunc solito blandiendi more exiliebat. Superat omnia, quæ de alio quodam asserere possum, è Barchinone abduxeram in hospitalibus ædibus ortum, non alia de causa, quàm quòd risum nobis excitaret: lugubres vestes ob Maximiliani

obitum deferentibus, oblonga (ut moris est) cauda, quam pueri deferunt: ipse pueri vicem obire nitebatur. Anno ab hoc tertio, Ferdinandus Caroli frater, in oppido Lincio desponsauerat Annam Ladislai Vngariæ Regis filiam, virginem forma, probitatæque incomparabilem; accitus à fratre in Belgas properabat, sequebamus inita societate Stabius, & ego: Stabius, qui ob multiplicem eruditionem Maximiliano pergratus fuerat; præmittebatur famulus, qui hospitium disponderet, hunc sequebatur Canis; inuento hospitio, non, utique famulo assidebat potationi dedito (erat quippe Germanus) quin ad ædes decurrebat, in quas Princeps diuersurus erat, nostrum aduentum obseruans, venientes ad præscriptum hospitium ducebat: quis huius officij monuerat? aut unde sciuerat nos, à Principis latere non recessuros? quis porro monstraue- rat ædes Principis hospitio dicatas? ex commeantium, atque exeuntium frequentia suomet iudicio coniiciebat; neque hoc semel factum, sed diebus singulis, toto itinere, stupente prorsus Stabio. Atqui hic idem altitudine exi-

guus, toruo capite, cruribus breuibus, verum quæ grandi suffecissent, maculis fulvis & albis distinctus, truncatis auribus, cauda mutila cæteris turpior, quàm quibus coloribus pinximus: in Cæsaris tamen, atque fratris, & aliorum Procerum notitiam venerat, nunquam non à ianitoribus intromissus, Curtaldi nomine, quo Gallico idiomate præpingues equi cauda, & auribus mutili dicuntur: rectà ad Imperatorem ibat, succinctique gladij cuspide, prurientem auriculam, ridente Cæsare scalpebat, eadem risus, & notitiæ causa in Ferdinando erat. At non eadem in Margareta, utebatur hæc medico Ioanne Maria Cataneo Salodiensi, qui ob perspicax in ea arte iudicium, eruditionem, & eximiam quandam comitatem, patri Maximiliano mirè charus fuerat; cum hoc mihi hospitij & veteris necessitudinis ab illo vsque tempore ius intercedebat: itaque si quando aberrasset canis, regiam petebat Cataneum saltem indagaturus, sedebat distentis taperibus, desuper iniectis puluillis Regina, multis circum stipata virginibus, nullam tanto è numero accedebat, præter

Principem ipsam, sublatóque crure dilatatam vestis caudam roratim perfundebat, cum cachino sciscitante Regina cuius foret, Catanei Medici referebant; alius, qui non turpis extitisset, millies eiectus fuisset, vbi is nullius rei apparente gratia, iniuriosus potius, quàm officiosus, cum plausu admjttebatur. Quare in mentem mihi veniebat, quàm sæpe apud Reges, hominum monstra alerentur, neque alerentur (istud enim cum belluis commune fieret) sed in delitiis haberentur: recordabárque apud Leonem Decimum, vidisse Serapicam; apud Clementem Septimum, Balium; qui tantum à literis aberant, quantum à moribus, nulla prorsus virtute præditi: vtpote quorum alter apud Sanseuerinum Cardinalem canum curam gesserat: alter Portuensi inter Vicentinas familias, clarissimæ à pedibus inseruierat, facie, atque corpore fœdissimos ambos (ne quis fœdius interpretetur) & cæca tamen Principis gratia, ad tãtas opes deuenisse, vt singulorum annui redditus decem aureorum millia penderent. Cuius in memoratorum pectore rationi locum fuisse dicemus?

mus? in ipsisme quibus præter adulandi & lenocinandi peritiam, nihil humani fuit? An in Pontificibus illis, qui posthabitis multis doctis, & de se benemeritis, istiusmodi nebulonibus delectabantur? Atqui & bellæ adulari norunt, atque lenocinari, ne hanc præclaram gloriam sibi solis homines vindicent. Cæterum expediam prius auium solertiam, & ingenium ostendere. Picæ diligentius inspectum nidum suum sentientes, aliò transferunt ova, & quoniam earum digiti complectendis, transferendisque accommodati minimè sunt, furculum super bina ova imponunt, suoque stercore conglutinantes, media supposita ceruice, æqua vtrinque libra aliò deportant. Perdices, in quo loco peperere, non incubant: ne frequentior conuersatio sit suspecta, ouaque aliò, atque aliò transferunt, suosmet maritos fallentes, ne libidinis, cuius impatientissimi sunt, intemperantia frangantur. Potest homini maior astutia inesse, quàm Coturnici? cuius ad nidum si cœperis accedere, procurrat ad pedes, prægrauem, aut delumbem, se simulans; subitoque in procursu, aut

breui aliquo volatu cadit, quasi ala fracta, aut altero pede clauda, tardique cursus vana capiendi spe sequentem frustrans, à nido procul abducit; donec pauore libera reuocante materna cura, in sulco resupina, terræ gleba pedibus apprehensa se operit. Verumenimvero quid opus singula perquirere? qui volucrum ingenia pernoscere vult: contempletur qua arte nidificentur Hirundines, si luti copia desit, pennis aqua perlutis puluerem madefaciunt, eoque in luti locum vtuntur, nidum stramento roborant, mollibus plumis, & floccis sternunt: ne frigidior fouendis ouis, ne durior natis pullis sit, in agris diuersa figura nidos confingunt, supinos, porrectis in angustum faucibus, vtero capaci, qua peritia occultandis pullis, qua substernendis molles. Quid? in Heracleotico Ægypti ostio, euaganti Nilo inexpugnabilem molem opponunt, continuato opere vnus ferme stadij spatio: quod humanæ manus vix perficere possent; vnde futurum incrementum Nilii diuinarunt, nisi quod longo & memori experimento didicere? ergo præteritorum memores præsentia ponde-

rant, & futuris medentur, quæ ratione non natura fieri, nemo inficiabitur. Pari prudentia quæ nidos in ripis faciunt, in speciem pilæ absoluunt, ne aditus inueniri queat: & Picæ suos in cyathi modum arboribus suspendunt, ne qua illuc bestiola repar: quæ verò ramorum tabulata sustinendis nidis adedè prouidè eligunt, vt densa camera & frondes ab imbre defendant: palam faciunt non natura id agere, sed prudentia, quæ à ratione seiuncta esse non potest. Perdices corporis pondere prohibetæ, sublimia petere, sua interris cunabula faciunt mira sedulitate, incredibili sensu, aduersus feras fruticunientes, spinis vallantes, stragulum ouis molli puluere cumulantes. Quàm vellem, inquit Cardinalis, in mentem tibi venisset istæ hodiernâ die interequitandum differere, multum itineris leuasses, nec Solis ardorem, nec pulueris molestiam sensissemus: Quare præcipiti iam nocte reliqua in crastinam equitationem differamus. Cum his affuere familiares funalibus accensis, Cardinalis suum in cubiculum: ipse in proximum è regione hospitium diuertit.



HIERONYMI  
R O R A R I I

*QVOD ANIMALIA BRVTA  
sape ratione vtiuntur melius homine.*

LIBER SECVNDVS.

**P**OSTER A luce descen-  
debamus è colle, in quo  
Veliterna vrbs sita; & cir-  
cumspectans Cardinalis;  
Vbi, inquit, sunt vrbes;  
quæ tametsi ruinis obsutæ, nominis co-  
lebritate adhuc florent? Antium, Ar-  
dea, Lauinium; est hæc tota regio La-  
tina? & quousque? mihi quidem maio-  
ri ex parte palustris videtur, nec solùm  
infructuosa, verùm etiam morbosa. To-  
tùm, inquam, quod cernis, ab Ostia  
Circeios vsque, antiquum Latium fuit;  
à mari verò recedēdo, non multum pro-



H. RORARII LIBER II. 85

cessit, postea maritima Latij ora usque  
Sinuessam, quæ amantissimi mei Augu-  
stini Sueffiæ clarissimi huiusce ætatis  
philosophi patria existit. In alteram ve-  
rò partem, quæ est opulentissima, at-  
que fertilissima in Campaniam, ac Sam-  
nium, & Pelignos, atque alios Apen-  
nini incolas respice; dextrorsum in rupe  
quadagesimo ab Ostia lapide, situm  
est Ancium Volscorum, præclaris quon-  
dam ædificiis ornatum: siquidem viro-  
rum Principum diuerticulum erat, ubi  
vacationem nactis ocio indulgere libui-  
set. Inter utramque urbem Lauinium;  
super hæc Ardea Rutulorum, cui pro-  
pinqua fuit Veneris ædes, in qua Lati-  
norum conventus celebrabantur, sed  
hæc equitando melius oculis lustrabi-  
mus. Iubes autem cœptum de Brutis a-  
nimalibus sermonem ad calcem perdu-  
cere: placet, inquit, ita tamen, ut sicut  
in fortitudine recensenda; sic in hæc  
præclara temperantiæ virtute, aliâ;  
quàm Plutarchus, incedas viâ; non vi-  
delicet temperatiores hominibus feras  
esse demonstrando duntaxat, quia statis  
temporibus suo quæque in genere mis-  
ceatur, totum hoc naturæ tribuendum:

illud rationis proprium fuerit , ostendere etiam quæ sui generis non sunt , belluas appetere , & ab his abstinere , ne naturæ legem violent. Non enim est temperantiæ ab his continere quibus animum non appuleris ; & præfixis à natura terminis non excedere. Rectè inquam ; sed cui dubium , animalia diuersi generis inuicem misceri ? omittamus vulgatum illud , semper aliquid noui Africam afferre ; quod non aliunde originem haurit , quàm quia amnium raritate ad vnum diuersi generis feræ congregatæ , quam fors obtulerit , incunt , & inde monstruosi eduntur partus ; posset tamen hoc stimulante libidine necessitati ascribi ; quanquam quid obstat inter multa vnumquodque quod sui generis fuerit , quærere ? Sed omittamus testem citare Africam ; quid tam inimicum , quàm canes , & lupi ? qui nunquam desinunt inuicem infidiari. Proximum est patriæ meæ Sacillum oppidum ( in quo doctissimus Franciscus Amaltheus publico stipendio humaniores litteras proficitur , cuius sub ductu pueritiæ meæ rudimentum deposui ) amœnum flumine , pri-

uatis ornatum ædificiis, ciuium nobilitate conspicuum : extra mœnia monasterium est diuæ Virgini dicatum, viridario clausum, tribus ex partibus aluente flumine, visu periucundum ; unde noctem non intermittebat Canis, quin in certamen cum lupis egredere-  
tur, nec ab altera parte cessabatur, cum mutuo conuenissent præfixo dimicandi loco, res acriter vtrinque gerebatur, sæpè saucius Canis redibat, sæpiùs hostili sanguine perfusus : accidit semel vnius monachi negligentia, qui ferreis mucronibus munitum torquem in pridiana pugna fractum, artifici aptandum dederat, incustoditum canem relinqui, dearmatumque in nocturnum certamen prodire, vbi à quatuor lupis, qui in eius necem coniurauerant, multis plagis confectus occubuit. Sunt profectò exitiosa inter illos odia, & neutris eorum non marium, non fœminarum copia deest ; & nascuntur tamen ex illis, quos Lyciscas vocant.

*Nonne ego te vidi Damonis pessime caprum  
Excipere insidiis, multum latrante Lycisca ?  
Quæ acerbiora, & perpetua magis odia  
reperiuntur, quàm inter Feles & Canes ?*

domi tamen nostræ inuentus est Canis, qui Felem iniret, & quidem grandior, quàm par erat: dabam tunc operam humanioribus litteris sub Sabellico eloquentissimo viro. Blanca mater religiosa mulier, monstruosum abominata fœtum, flumine mergi iussit; referebat postea editos catulos ab utroque similitudinis quædam traxisse; haud rectè recordor, felinis pedibus, cætera canes, an caninis reliqua feles; ipse ego vidi inter se lasciuientes, & modò felem submittentem se cani, modò canem feli, toto capite ore sumpto ludibundum trahere. Maius aliquid affero: Belluas non solum, quæ sui generis non sunt, appetere; verum etiam homines adamasse. Elephas memoratur in Ægypto puellam corollas vendentem dilexisse; ac ne quis vulgariter electam putet, Aristophani celeberrimo Grammatico mirè charam: alius vnguentariam quandam: alius iuuenem Syracusanum in exercitu Ptolomæi Regis, amoris indicia fuere gaudium conspicientis, inconditæ blanditiæ, stipes, quas populus dabat, seruatiæ, & amatiæ in sinus effusæ. Octauio Cæsare imperante, Delphinus

pauperis cuiusdam filium deperibat; nulla præterlabebatur hora, in qua Simonis nomine, quo plurimum gaudent, vocatus à puero quamuis latens, non protinus aduolaret: è manu pueri palstus, ascensuro dorsum præbebat, conditis prius pinnæ aculeis, ne quam offensionem puer acciperet: inde per medium æquor ex Baiano littore, Puteolos in litterarium ludum deferebat; simili modo pluribus annis reuchens, donec puero morbo extincto, ad consuetum locum subinde veniens, tristis, & mœrenti similis, ipse quoque extinctus est. In Iasso vrbe fertur alius sic puerum deperisse, vt abeuntem in litrus auidè sectando, in arenam inuectus expirauerit. In eadem vrbe alius puerum amauit maria fulcare gaudentem, quem cum repentinæ procellæ fluctibus exanimassent, cadauer retulit, causamque lethi se fuisse fatendo, non amplius in mare reuersus in sicco expirauit. Anser amauit formam pueri: quin & puellam Ptolomæo Regi cythara canentem, cui eodem tempore riuallis in amore erat Aries. Fuit & qui amore tactus perpetuus comes adhæserit Lacydi

Etâ viâ ad litterarum gymnasium duceretur : itaque spatiatu gaudens , per amplum æquor vehebatur , eruditioni deditus , omisso lasciuiendi solito illius piscis more , ad scholam deferebatur : quid sui ipsius cognita culpa , & secuta damnatio : qui cùm futuræ tempestatis maximè præscij sint : simplici , & inexperto puero , in vitæ discrimine indulgere minimè debuerat. In quibus igitur , inquit Cardinalis , feræ , hominibus temperatiores sunt , si suo genere non contentæ , aliena apperunt ? nec aliena tantùm , verùm homines , à quorum natura tantopere absunt ? in illo inquam , quòd amores quidem sequuntur , agendi modum deferunt , & abominantur , rectum à prauo , honestum à turpi discernentes : in illo præterea , quod quemadmodum dixisti , stata coeundi tempora habent , nec post conceptum , fœminæ mares , non mares fœminas sequuntur ; solis hominibus non veris , non æstatis , non autumnis , non hyemis , non diei , non noctis discriminata sunt tempora ; mares grauidas , grauidæ mares appetunt , nulla vnquam futura satietate. Messalina Claudij digna orbis

imperio mulier, quando è prostituta in  
certamen prouocabat: palmamque re-  
tulit, quinto & vicesimo concubitu vi-  
atrix, ac triumphatrix.

*Respice riuales Dinorum; Claudius (audi)*

*Quæ tulerit, dormire virum quum fense-  
rat uxor,*

*Ausa Palatino tegetem præferre cubili,*

*Sumere nocturnos meretrix Augusta cu-  
cullus,*

*Linguebat, comite ancilla nõ amplius una,*

*Et nigrum flauo crinem abscondente ga-  
lero,*

*Intrauit calidum veteri centone lupanar,*

*Et cellam vacuum, atque suam: tunc nuda  
papillis*

*Constitit auratis, titulum mentita Lyciscæ,*

*Ostenditque tuum generose Britannicæ  
ventrem,*

*Excepit blanda intrantes, atque æra po-  
poscit:*

*Mox lenone suas iam dimittente puellas*

*Tristis abit: sed quod potuit tamen, ultima,  
cellam*

*Clausi, adhuc ardens rigida tentigine  
vulua,*

*Et lassata viris, nondum satiata recessit.*

*Confidera quàm parua in priuatis, quan-*

do nulla in imperatoriis istius turpitudinis verecundia : fileamus interim fraudes, laqueos, dolos, qui miseris maritis neſtuntur; fileamus venena, quibus inuicem inſidiantur.

*Faciunt grauiora coacta*

*Imperio ſexus : minimúmque libidine peccant.*

Itaque tot cædes tam immanes eadem de cauſa inter homines patrantur. At Elephanti non ſolùm adulteria non norunt : verùm etiam ſentiunt iſtius actus turpitudinem ; quoties etenim fœminis miſcentur, non antè ad ſuorum agmen reuertuntur ; quàm ſe flumine abluerint. Columbæ non fœminæ, non mares, alienos concubitus experiuntur : quamuis doctus ille Poëta, haud doctè de impudico adultero cecinerit ;

*Perambulauit omnium cubilia ;*

*Vt albulus Columbulus Dionæus.*

Communem ſeruant domum, nec deſerunt, niſi cœlebs aut vidua ; nos eò impudicitix labimur, vt fermè nullis magis, quàm coniugatis delectemur, vnde fit, vt amarâ zelotypiâ dies & noctes torqueamur ; & tamen tantum à ratione abſumus, vt ſpectari vxores nò.



stras gaudeamus, & ad choreas impudicissima nempe lenocinia subinde mitamus. Leonēs coïtum Pardi, in adultera odore sentiunt, totaque vi confurgunt in pœnam: quàm multos in nostris reperiemus (vt denuð pudendi Satyrici carmine vtat)

*Doctos ad calicem vigilanti stertere naso:*  
 Quibus quanto ratione præstant asini syluestres? qui præterquàm quòd singulis fœminarum gregibus duces apponunt; natos quoque mares si nascentibus interuenerint, morsu castrant, libidinis æmulos metuentes. Iidem Columbi, à quibus adulterij suspicionem abesse diximus, sic suis imperant, vt pleno querelarum guttore, sæuisque rostri ictibus immeritas diuerberant: hæc non eò dicimus, vt quis immeritas coniuges plectat, sed vt illis sic dominetur, quemadmodum suis ipsi Columbi solent, qui in satisfactione iniuriæ oscula mitia iungunt, crebris pedum orbibus adulantes, parturienti solatia, & ministeria exhibent, sobolis curas æqua lance dispertiunt, pigrius ad pullos intrantem castigant. Piget referre quàm multi hominum

sint , qui spreto coniugali amore , necessitatibus omnibus circumuentas uxores , sub ipsum pariendi tempus linquant ; etiam dotalia , quæ secum attulerint , cum aleatoribus , cum ganeonibus , cum meretriculis helluantes : & ne viros duntaxat incusemus , capiant à nobis & mulieres , effrænis libidinis suæ promeritam laudem. Nouimus , quæ relicto marito , relicta multiplici sobole , abeuntem adulterum peregrè est comitata : nouimus vicini oppidi Coneglani cuiusdam non amorem veriùs quàm amentiam ; egregiâ formâ non obscuris orta parentibus , vidua cum duobus venustis filiolis relicta , stabularium famulum plusquàm rusticum , facie fœdum , strumarum cicatricibus quasi mancipium stigmatibus iniustum , est secuta : plûsque inflammata libido valuit , quàm viuentium parentum pietas , quàm dulcium filiorum charitas , quàm sui ipsius , totiusque familiæ decor : & has rationis participes feras , quæ nullo periculo , nullo terrore , à dulcium pignorum tutela abiguntur expertes rationis esse dicemus ? In omni profectò sce-

lere, belluis nocentiores homines sunt; hi namque, non belluz, in vtroque sexu Veneris inuenerunt diuerticula, quo nil flagitiosius dici potest. Testantur litterarum monumenta, fuisse gregis custodem, qui equum ut matrem iniret, nunquam inducere potuerit; & quoniam ambo eximiâ specie erant, fraude tandem illuisse, velatis oculis, ne matrem videret: detracto postmodum operimento, & agnito cum matre concubitu, petisse prærupta, & se patrati sceleris reum pessundedis. Maris hæc virtus; alibi fœminæ, siquidem in Reatino agro equa lacerato prius aurigâ, qui flagitij auctor fuerat, eundem exitum habuit. Pondera nunc homines; Possum non vnum item & alterum, sed Ciuitates totas citare, quæ pro ludibrio tenent consanguinitatis iura tueri; duobus exemplis nefandi sceleris plenis contentus abibo. Adriano Sexto Pontifice, Romam venit ex Hispaniis adolescens, à Sacerdote coactus suum flagitium per vrbes, per vicos, per compita prodere; lachrymabundus admissum incestum vulgabat: sequebatur scelerata mater, quæ simplicem seduxerat

rat iuuenem, veritatem dicere confirmando : & ne fœminæ rationis pondere semper carentis, cæcam libidinem tantummodo culpes, accipe & viri. Quindecim eram annorum, quum Patauium ad ius ciuile discendum missus fui; quam iuris scientiam mirè oderam, sed cogebar Fratri parere; Fratri, qui orbum parente à primis annis educauerat, & quem ego patris loco venerabar, licèt moriens neque filij, neque fratris loco habuerit, alieno instituto herede, ad dignitatem per me potiùs prouectus, quàm vlla iniuria laceffitus. Ibi pauperculæ cuiusdam Sartoris filix primis amoribus captus viuebam; cuius forma qui genuerat pater æquè impulsus, absente coniuge, renitentem, ad necem propè diuerberauit; hoc initium doloris puellæ, hæc reuertenti matri obitus causa fuit, acerbo nuncio vitam præripiente; qua opportunitate oblatâ, diuini atque humani iuris violator, simulato peste obiisse, cuius suspitione ciuitas laborabat : domi ( vt est in tali discrimine mos ) occludi se curauit, infelix Puella ab Iudice interrogata, cur vim non detulisset, negabat paternæ necis

auctorem existere potuisse. Ergo belluæ, huiusmodi abominandum crimen admittere fugerunt, & fraude seductæ, morte luerunt, indignas se vita iudicantes; à quo crimine, non deceptus homo, non coactus, suæque penitus spontis temperare non valuit. Prodigiosum, inquit Cardinalis, scelus, & eorumdem sanguine piandum: nec illorum minus, qui Deo dicatas virgines suis incestibus polluere tentant: quibus omnibus non potest non adempta ratio videri. Sed nunquid opinaris potuisse animalia bruta, cognationis intellectum habere? possum, inquam, suspicari, nam in gregibus cernere datur iuvenes equos, prioris anni sorores libentiùs comitari, quàm matrem, non quidem educationis memores (valeret hoc in matre) verùm quòd sororum custodes esse cupiunt. Sunt igitur belluæ temperiores hominibus, & ne dubites adhuc quasi natura, non ratione desinant ab iis, à quibus se continere debent, qui ratione vtuntur: scito ne lenocinia quidem inter illas deesse, quæ animum labefactant, & à rectâ abducunt semita. Erat mihi in oppido Belzio Erasmi

Strembergeri Canonici tui , & amantissimi mei optimi viri patria, Catella ex earum genere , quas Setinas vocant , hæc statò anni tempore , ad libidinem excitata, nunquam tamen à meo latere recedebat, legerem, scriberem, in disco semper cubabat, præsertim si daretur in bireto (adeo parua erat) circumuoluendo se: qua in re animaduersione dignum erat , quòd cùm inter contubernales forent qui purpureo, quique veluteo vterentur; pretiosioris æstimatione facta; aduersùs Plutarchi sententiam, qui negat animalia bruta rerum pretiis commoueri; à viliori in pretiosius transibat: erat in eisdem ædibus facta hospitis canis, quæ primo diluculo patefacta domus ianua, lenæ vice fungens, canum turbam secum adducebat. Et videmus profectò quoties concipiendi tempus aduenit, ad vnã multos vndique conuenire, non odore allectos, quando & quæ intra domesticos parietes seruantur, suos aduentores, suos procos, suos amatores & ritales habent: quàm rem & lupos facere videmus, vt sub ipsum concipiendi tempus, ad vnius vocem denunciantis lu-

pam adesse, vndique concurrant ceu, inquit Cardinalis, loqui, ac se mutuo intelligere norint. Ecquid, inquam, aliud reris? cum non eodem semper latratu vtantur canes, vario barritu elephanti, diuerso rugitu leones, nunc hoc, nunc illo vlulatu lupi: & si nostros sermones intelligunt (quod inficiabitur nemo) cur non mutux alicuius intelligentiæ notitiam habere credendum est? Experimur istos nostros familiares Canes, quæ ad ipsos præferimus, verba percipere: diximus leonem precantem mulierem intellexisse: retulimus elephantem in exercitu Antiochi Regis audito de futuro principatu edicto, se repente in flumen immisisse. Miserat Emanuel Lusitaniæ, dignus memoria Rex ob propagatam Rempublicam Christianam, Leoni Decimo Rhinocerotem, Capram Indicam, Elephantem: referebant ductores non prius Elephantem in nauem intromitti potuisse, quàm audito ad orbis Christiani Principem duci, & dato dereditu iureiurando: viditque tunc Roma longo pòst tempore; quæ forsàn legendo minus crediderat, inco-

ditos motus ad imperium agentem, stipem, quæ per vicos transeunti porrigebatur, suo rectori reddentem, hauritam proboscide aquam tamdiu seruantem, donec in mulierem aliquam earum, quæ è transenna prætereuntem spectabant, effundere iuebatur: quin in sacratissimi Corporis Christi sollemnitate, Pontifici cum pompa transeuntem, genua submittentem, & quo ritu sciret, adorantem. Pisces neque membra, neque foramina auditus habent, memoratur tamen fuisse in piscinis Iulij Cæsaris quædam piscium genera, quæ ad nomina venirent: retulimus Delphinum Simonis nomine vocitatum, adesse: De Auibus referre minus mirum fuerit, quæ laborant vulgò etiam verba nostra discere, dicam tamen, quod admirationem afferet. Narrabat Iacobus Bannissius, cui (quemadmodum nosti) vel dicenti, vel scribenti in primis fides habebatur: vidisse apud Hispanum mercatorem Antuerpiæ Psitacum, qui Latinè salutanti, Latinè redderet salutem; multaque Hispana, multa Belgica lingua proferret: illud erat præcipuum, quod



cùm Christianæ fidei symbolum exprimere vellet, nullum intermittebat verbum vsque ad illud, *Et in unum Dominum Iesum Christum*; si quis verbum interposuisset, omisso illo, sequens necitebat, alternis verbis dicere contendens; veluti si *Credo in unum Deum* quispiam dixisset, subiungebat Psitacus, *patrem omnipotentem*; dixisset ille, *factorem cæli & terre*: addebat Psitacus *visibilem & invisibilem*; non poterat absque verborum intellectu, & percognito sensu hoc agere: quòd si aliena, & quæ ad se minimè spectant, intelligunt; cur non eorum quæ sua sunt, mutuam quandam habere intelligentiam credere possumus? Venetiis memorant (veruntamen, quia vulgi rumor, fidem non obstringimus) fuisse Psitacum, qui quæ dominam perperam agere viderat, repetenti domum marito sedulò nunciabat; indignatam mulierem libidinem suam detegi, auis podicem acu fuisse, ne violentæ mortis indicium suboleret: aduenienti de more domino Psitacum inconditè obnunciasse ferunt, culum sibi dominam fuisse, nec illum, quid vellet, prius intellexisse, quàm mortuo

Pſiraco lethi cauſam adinuenit. Ingenio certè pollent aues, quam rem heſterno ſermone fatis ſupérque declarauimus: memoria porrò, vt in ambiguo ponam, an hoc tantum bonum largiùs animalia bruta, quàm homines ſint aſſecuta: Si- quidem Canem inducit Homerus, poſt multorum annorum decurſa tempora, peregrè redeuntem dominum agnoſcentem: longiſſima hercle memine- runt itinera, idem & Equi faciunt: Leo memori obſeruatione in quacunque multitudine appetit illum qui vulnus intulerit: Elephas perhibetur ſenem nouiſſe, qui multis annis antè in iuuen- tute rexerat; quod à Dracone quoque factum alibi recenſuimus. Quid tam brutum quàm Sus? cui animam pro ſa- le datam, non illepidè aiebat Chryſip- pus; & ſuarij tamen vocem dignoſcit, in ſuàque remeare nouit. Quod inſuper cuiuſdam incredibilis memoriæ indi- cium in Hirundine? quæ terrarum tam immenſa, maris que ſpatia, ſingulis an- nis tranſuolans, reddita anni vice, in aſſuetam reuertitur, quid regionem? immò in eandem domum, domusque partem, in qua priùs nidificauerit; vo-

luit experiri mater prudens mulier, an eadem essent : captaque pedem aureo filo deuinxit, eodem nexa sequenti anno reuersa est : addamus his, quo studio quæ aliena sunt ab ipsis, qua diligentia discunt. Elephas, qui tardioris ingenij culpa sæpiùs castigatus fuerat, visus est noctu eadem meditari, est etenim in illa quoque vasta mole mira docilitas, vt non desint qui autument fuisse, qui Græcarum literarum ductus didicerit, solitumque scribere, *Ipse ego hæc scripsi, & Celtica spolia dicaui.* Viri apud Sarmatas in regione Lituaniæ, docentur ad tubarum sonitum erigi, & choreas imitari; reliquæ itidem quadrupedes, Equi, & in primis Canes, quorum docilitatem, præterquam quòd hesternâ die miratus es, sic vulgò nota, vt teste non egeat. Quid est cur Picæ adament verba nostra nullo sibi nec vsui, nec voluptati futura? cùm nulla delectatio familiaribus verbis nullo concentu prolatis insit: quanta intra se sedulitate meditantur, vt sæpe verbi difficultate victæ emoriantur; si quod interciderit verbum, & à docente repetatur, quo

repentè gaudio exhilarantur, quibus quæ potest esse loquacitas expressior? Referam Turdos, qui non ita nobis sicut veteribus, miraculo sunt. Non fraudabo gloria sua Coruos, quando inuentus est, qui Tiberium Cæsarem, dein Drusum Germanicum nominatim, mox transeuntem Populum Romanum salutarer: quem vnus liuore exanimatum, sic indoluit Populus Romanus, vt qui necem indignam eorum quorum virtute Romanum creuerat Imperium, neglexerint: vnus auis interemptorem morte damnarent, dignamque duceret, cui celebrarent exequias; & duorum Æthiopum humeris impositam comitarentur, præcedente tibicine omnis generis florum corollis iactis, ad secundum vsque lapidem, vbi rogos structus fuerat. Quo tempore Romanus eques Cornicem habebat è Bætica aduectam, colore admodum nigro, plura verba exprimentem, & alia, atque alia sedulò discentem. Quòd si belluæ ingenio pollent, memoriâ vigent, discendi desiderio accenduntur, & nostras in primis voces imitandi; cur non credere debemus, habere etiam

quò se mutudò intelligant? Nónne videmus in Hirundinum pullis appropinquante euolandi tempore, quemadmodum cæteræ sui generis, & fortasse consanguinitate propinquæ, inuitentur ad circumuolandum, & hortandum pullos, ne paueant præpeti volatui se credere, paratas esse si deciderint, ab humo tollere: non mediis fidiis naturæ instinctu scire possunt, quid alibi pullo-  
rum agatur, nisi ab aliis certiores prius factæ; quæ namque istæ cura foret, suos nidos ut deferant, alienos ut visitent? illæ mehercle vicinitate, aut sanguine iunctæ, à pullo-  
rum parentibus monentur adoleuisse suos, & in educendis alienâ ope indigere; hinc illa circumuolantium frequentia, hinc illa assiduitas stridula modò voce excitantium, modò rostro pungentium, volatûsque crebrò docentium. Quæ res fidem facit, vera fuisse, quæ de Apollonio Tyaneo traduntur; eo videlicet cum discipulis in pomærio ambulante, aduolasse Passerem, solitâque garrulitate aliis passeribus quidpiam nunciasse; repetito mox volatu, sequentibus illis abiisse; conuersum ad discipulos

Apollonium dixisse, cecidisse asinum, qui milium deferret, ruptoque sacco prorupisse milium, idcirco aues ad cibum inuitatas; iuisse discipulos, & rem non secus, quàm Apollonius dixerat, inuenisse: huic sententiæ ascribebat Melampodes, asserens Draconem quendam aures lambendo, intelligentiam sibi sermonis auium dedisse: & referebat Democritus Abderites aues quarum confuso è sanguine serpens gigneretur, quem si quis gustasset, intellecturus esset auium colloquia. At qui nullum ab iis verbum exprimi videntur? idem nobis contingit in ignotis, atque barbaris linguis, vt verbum à verbo minimè secernamus. Musicam in magnâ gloriâ habuerunt Græci, summam eruditionem in ea ponentes; & dubio procul adeo propria est hominis, vt sint qui putent animam nostram harmoniam esse; musica (ne quid quod hominis sit desit) delectantur belluæ. Cerui pastorali fistulæ aures arrigunt: Delphini lira & fidibus mulcentur, quæ res Arioni Cytharædo salutis fuit. In auariis, quæ voluptatis gratia fiunt, (quale amœnissimum in

ædibus meis cernitur , æreo ex rete ,  
etiam desuper clausum , iuniperis , bu-  
xis , ligustris , cæterisque virgultis lon-  
gè conspicuum ) inclusæ aues non v-  
nius generis , diuersi prorsus cantus  
concordant , suauissimum edentes con-  
centum. Quid autem , quæ intus hye-  
me seruantur in habitatione à frigore  
tuta , igne fornaci incluso alioris sæ-  
uitia mitescente ( quæ apud antiquos  
Italiæ populos in vsu non erat , nec  
nunc etiam ferè est ; vos Germani fre-  
quentes vtimini , & ipse diu inter vos  
assuetus , percommodam iudicans , ca-  
rere non possum ) pendent è laqueari  
virentes ramusculi , diùque viridita-  
tem seruantes , frondibus buxo non  
dissimilibus , inter quasi totidem mar-  
garitis ad viscum natis : quos ramos ve-  
tustæ pomi , pirique , luxuriante humo-  
ris copia ferunt ; in hos seruatæ aues  
volitant , & est operæpretium cerne-  
re , vt albescente die in vnum conue-  
niant ; exceptâ , quæ veluti musices ma-  
gistra , & artifex , reliquis cantus ini-  
tium dat , eam sequuntur reliquæ mel-  
lifuam cantilenam edentes : finito con-  
centu , ad cibum vnanimis abeunt , non

eo die vt antè reuersuræ, aliæ alios ramos petunt: è quibus denuò concinunt, veluti iam edoctæ, quam earum quælibet vocis, cantûsque partem, tenere debeat. Quid verbis opus? in vna aui- cula totius musices ratio continetur, quam ars nostra tot & tam diuersis instrumentis excogitauit: plena, grauis, acuta, crebra, extensa, vibrans, summa, media, ima, in qua discenda, atque exercenda, operæpretium est animaduertere, quâ diligentîâ meditentur versus, quâ futuri cantus experi- entiâ versus vicissim reddant, quâ pa- tientîâ reprehensæ emendationis cor- rectionem intelligant, & vt vario licet inter se cantu, suo tamen omnes con- tentæ sint, alienos non excipiant, neque imitentur. Quamobrem est cur mirer, diligentissimum alioqui naturæ rerum scriptorem, attestatum reliquisse, Ti- tum, atque Domitianum eodem tem- pore habuisse Luscinias doctas Græ- cè, & Latine: illæ verò singularem cantus sui excellentiam agnoscentes, contemnunt reliquas omnes, non verba nostra appetunt, nedum alia- rum volucrum, vt imitentur: quanto ra-



tionis capaciores , quàm nostratium  
nonnulli , qui vernaculam linguam ve-  
rè vernaculam , à vernis Gotthis &  
Vandalis ortam , Latinæ præferre au-  
dent : cuius maiestate amissum orbis  
imperium , ob eam vnam non de pos-  
sessione penitus deiecti , adhuc retine-  
mus. Veteres ( aiunt ) Romani suam  
quæ barbara fuit , excolendo , melio-  
rem Græca , & copiosorem reddide-  
runt ; idem nobis laborandum , vt nos ,  
nostramque à barbarie vindicemus.  
Quam tandem tuam ? aut , à qua bar-  
barie ? Latinè loquebantur omnes :  
suæque virtute iugum exteris nationi-  
bus imposuerunt ; Patres nostri eorum  
progenies , tantùm ab illis degenera-  
uerunt , vt non sat fuerit suâ ignaviâ  
pati barbaros iugum detrectare : nisi suis  
insuper dissensionibus inuitarent ad oc-  
cupandam Italiam : nos digni patribus  
filij , non sat habuimus insultantem  
Gallum , deprædantem Hispanum ,  
helluantem Germanum ferre ; nisi per-  
fidum insuper Turcam , in nos debac-  
chantem læti intueremur. I nunc , &  
te Romanæ stirpis propaginem iacta :  
ab his nempe barbaris hæc lingua ,

quam veluti filiolarum exofcularis, originem haufit; qui cum Latinè loqui vel-  
lent, nec poffent eius excellentiam  
magis exprimere, quàm Sturni noſtram  
ſolent: præclaram iſtam, quam Lati-  
næ (ſi Deo placet) anteponiſ, condi-  
dere. Romani non vanis amoris cantio-  
nibus, ſed diſciplinis omnibus, quæ  
liberales dicuntur; quia homine libe-  
ro dignæ, ſermonem patrium ditârunt.  
Itaque in conuiuiis non fictæ mulierum  
næniæ canebantur, ſed quæ plena eru-  
ditionis erant.

*Cytharâ crinitus Iopas*

*Perſonat auratâ; docuit quæ maximus  
Atlas;*

*Hic canit errantem Lunam, Soliſque la-  
bores:*

*Vnde hominum genus, & pecudes; unde  
imber, & ignis,  
Arcturum, pluuiâſque Hyadas, geminôſ-  
que Triones,*

*Quid tantum Oceano properent ſe tingere  
Soles,*

*Hiberni: vel quæ tardis mora noctibus  
obſtet,*

*Ingeminant plauſum Tyrj, Troëſque ſe-  
quuntur.*

Et meritò quidem ingeminant plausum, non utique fictas virorum, atque mulierum vanas colloctiones, sed sobriis, sed doctis, sed purgatis auribus digna recenserī audientes. Apollonius Molo cū audisset Ciceronem orantem, non utique admiratus est exquisita verba, neque linguæ volubilitatem adimi Græcis ingemuit; sed artem, sed oratoriam vim, quæ sine multarum artium doctrina consistere non potest: Vbiego in ista eximia tua vim illam sentio, quam apud Græcos Demosthenes arte suâ conatur? ubi, quæ apud Ciceronem fuit illaborata? ubi inquam maiestatem, numénque illud? relege istorum libellos: qui istâ scripsere linguâ, nil nisi Cupidinis faces, nil nisi amantium, an ne amentium gemitus, lachrymas, & vana suspiria inuenies, nil denique nisi Milesias fabulas; & tantum quidam rationis amiserunt, ut ætatem absument in transferendis Latinis auctoribus, credo cerdonibus, laniis, & olitoribus placituri; ignari ad hoc, quodcunque una è lingua in aliam transtuleris, non eundem seruari leporem. Cæterum fac,  
quæ

quæ longè disparia sunt , paria omnia:  
Romani fines Imperij ab Oriente in  
Occidentem Solem propagantes, suam  
dilararunt, & (vt ait ille) quasi optimæ  
frugis sementem mortalibus dispertiti  
sunt: nec vlla tam barbara gens, tam a-  
uerfa nostris moribus existit, quæ non  
legat Latina: tu, qui Italiæ, nedum Or-  
bis, imperium amisisti; tu cuius cerui-  
ces premunt Germani, Galli, Hispani,  
nec hi satis, nisi in te concitetur Turca;  
quâ spe, quo vultu, quibustandem ef-  
feres terminis? legent hæc tua dissonæ  
linguis innumerabiles nationes; immò  
nec tota Italia plures in linguas diuisa,  
quàm ipsa vnquam Græcia fuerit; eue-  
niet tibi, quod sibi diuinavit Persius,

*Min tu? nemo hercule nemo,*

*Vel duo, vel nemo.*

Desinant (dices) ignari legere: ipse me  
à barbarie vindicasse gloriabor: ô calli-  
dos homines! ô rem excogitatam! ô  
ingenia suspicienda! an quod tibi tua in  
lingua licebit, vt eam exquisitiùs co-  
lendo à barbarie liberes; idem Germa-  
no, idem Pannoni, idem Sarmatæ,  
idem reliquis tam variis, tam barbaris  
nationibus non licebit? vt suam iti-

H

dem ornent, poliant, emungant? ecquid scis an id hodie quoque sedulò conentur? atqui memini vidisse apud Maximilianum Cæsarem duos, quibus à Secretis vteretur, nullam præterea, quàm Germanicam linguam callentes; Nicolaum Ciglerium, quem in copioso Ciceronis dicendi genere dominari; Gabrielem Foëtem, quem cum Sallustio Crispo in illo breui regnare dicerent: quòd si sua in lingua tantopere pollent, idque illis licet, qui erunt barbari? aut quæ lingua concinnior? quæ copiosior? digladiaberis cum barbaris, tibi tua pulchrior, illis sua melior videbitur, sublatâ interim mutui inter vos sermonis, magis, quàm inter belluas intelligentiâ; imitabimini procul dubio Simias, quibus sui catuli pulchriores cæteris videntur, eaque ratione tamdiu spectandos circumferunt, donec assiduâ tractatione enecent. Hercle non possum me continere, cum videam Latini sermonis candorem, & quasi sacramentum quoddam, quod per tot sæcula tam sanctè, tam religiosè custoditur, apud peregrinos, apud barbaros, apud hostes; à media in Italiâ

nat̃is non pollui modò ; verùm etiam  
aboleri ; non ob aliud , quàm ob imperi-  
tiam ; & quòd vel ad minimam eloquen-  
tiæ partem ascendere posse desperant.  
Qui ergo Latinus sermo barbaras gen-  
tes liberalibus artibus ditauit , qui le-  
ges docuit , mores instituit , viam ad  
omnem sapientiam muniuit ; quem ipsi  
barbari tanquam Deum de cælo dela-  
psum suspiciunt , ac venerantur , quòd  
illo duce videant se in mediâ barbarie  
natos sic erudiri , vt non ampliùs barba-  
ri dicantur : hunc Itali eius alumni pra-  
uo iudicio ; insipido gustu , ferro , igne ,  
quacunque vi persequentēs , extingue-  
re conabuntur.

*Dij prohibete minas ; Dij talem auertite  
casum.*

Mihi quidem multo magis furere vi-  
dentur hi nostri noui sapientes , quàm  
veteres illi seditiosi Tribuni plebis , qui  
incensa à Gallis Vrbe , Veios migrādum  
censebant , vt gloriari possent Galli non  
urbem tantum deuastasse , verùm etiam  
coëgisse Romanos deserto solo patrio  
in aliud transire : dirutis namque illi , &  
incensis ædificiis summæ pòpuli egesta-  
ti consulentes , in pulcherrimam , atque

munitissimam urbem , nullo impendio migrare suadebant : hi pulcherrimam omnium , ornatissimis structam ædificiis linquere hortantur , & in tenebri-  
cosam , immundam , olentem , transire :  
ut gloriari possint Gotthi , & Vandali ,  
non modò Italiæ Imperium per ducen-  
tos & ultra annos tenuisse , vastasse , di-  
ripuisse : verum etiam coëgisse indige-  
nâ abolitâ linguâ , quæ cæterarum lin-  
guarum regina fuerat , sua barbara uti .  
Vides igitur quanto maior ratio in vna  
auicula sit , quàm in tot delirantibus  
hominibus . Non dicerem , inquit Car-  
dinalis , quàm me hæc tua digressio af-  
fecerit ; etenim quæ istæc dementia est ,  
ut inuenta fruge , glande vescamur ? vi-  
rentem isti amœnam , atque pomife-  
ram arborem succident , ut eius loco  
sylvestrem , atque infructuosam plan-  
tent : unde tanta cæcitas ? cum tamen  
plerosque viderim non ineruditos idem  
sentientes : qui culpâ non intelligendi  
Latini sermonis excusari non possunt ,  
cum ea demum eloquentiæ laus sit ,  
quanto quis dilucidius suos è pectore  
sensus deprompserit . Rectè , inquam ,  
quin vide quantum inter utramque

linguam interfit ; quanto quis Latiniùs dixerit , tanto clariùs ab omnibus intelligetur : hinc illud Ciceronis , nemo extulit eum verbis , qui ita dixisset , vt qui adessent , intelligerent quid diceret ; sed contempsit eum , qui minus id facere potuisset : contrà in ista præclara vernacula , quanto quis exactiùs , tanto obscuriùs dixerit , vt ne à suæ quidem classis hominibus intelligatur : Potest oratio obscurior esse Dantis Aldigherij ? potest dilucidior diuina illa Ciceronis ? Cur igitur omnium maximus Rhetor Fabius ait , ille se profecisse sciat , cui Cicero valde placebit ; nimirum , quia legunt verba , sensus intelligunt , artem tanquam in Solem intuentes , introspicere non valent. Tales ( opinor ) reperi nobiles Germanos quosdam , è tuis nempe familiaribus ; ducebam , dum Romæ essemus , in Blossianos hortos ; ostendebam marmoreum in ima valle fontem marmoreis sedilibus circumclausum , virentibus ponè lauris , apricum alioqui fontem inumbrantibus : ducebam inter densas vites , per latam semitam



fructiferis arboribus omnis generis confitam; ascendebamus accliuem viam per syluulam citrorum immenso odore fragrantium, ad lapideas vtrinque piscinas; perueniebamus in aream, in qua Blossus meus Palladius, Romanæ urbis delitiæ, cuius solo nomine recreor, cœnare solet, iuxta vitreum fontem suffrantis aquulæ per simulatam fornicis rupem ductæ, rugoso è lapide decidentis Tyburtini fluminis guttis concreto; demonstrabam aduersum alium fontem per similem rupem leniter cadentem, qui ambo citros irrigarent, & vt inter vtrumque structæ parandis cibis ædes, quarum è medio tertius fons erumperet, superimpositis in theatri speciem columnis, quæ vitium umbracula sustinerent: paruipendebant omnia. Subibamus clium à læua propter fontem; indicabam digito lauretum, ne volucris vescentibus baccis cibus deesset: aiebant sic in Germania pinus nasci, quemadmodum in Romano agro citri, & lauri nascerentur; qui pinus nunquam vidisset, non illic minùs admiraturum. Perueniebamus ad ædes Blossij, ostendebam ex aduerso structum

gallinarium , lateritiis parietibus , latâ  
relictâ apricantibus areâ , mirabantur  
pauones Indicos ; quâ arte cubantibus  
gallinis , qua anseribus aquandi , qua  
villico fruendi floccipendebant. Ingre-  
diebamur cellarium inter vtramque ha-  
bitationem positum , placebat sum-  
mopere ducentorum vasorum capax ,  
multoque magis funditus hausta vina:  
quemadmodum verò prælum in cella-  
rij postica eminentiùs structum , in sin-  
gula dolia , nullius labore musta effun-  
deret ; vt lata per medium relictâ de-  
ambulatio , diuersâ à nostris ratione , in  
vtrumque latus pendens singula post  
terna vasa ex pauimento oblongas ha-  
beret foueas , quæ stillantia vina exci-  
perent , si fortè lignea dolia rumpi con-  
tigisset : negligebant hæc , non quòd a-  
liâ viâ , quàm per os in ventrem fundi  
deberent vina , sed quòd exquisitam ar-  
tem non aduerteabant. Ibamus inde in  
Piscientes hortos , iubebam atriolum  
inspicere , & adiuncta cubicula , pau-  
imenta , tectoria , cameras , picturæ va-  
riis coloribus elaboratas : egredieba-  
mur in porticum , ostentabam ima-  
gunculas albas in albo effictas , parietes

totos , & ipsam testudinem ornantes tam nitido candore, vt oculorum aciem perstringerent : vt frontispiciū porro sustinerent pretiosi marmoris columnæ, variâ formâ alternatim erectæ , hæ in arcum desinentes , illæ quadratâ formâ , vt totidem transfennæ viderentur, quæ frontem, quæ latera luci, & auræ peruia linquerent : Urbinatis Raphaëlis egregij nostri æui picturæ luminis discipuli doctum opus, ne quidem aspicere dignabantur, ad prospectum duntaxat decurrentes.

*Vnde totam licet asstimare Romam,*

*Et longam vallem nebulas regentes.*

In me conuersi Piscienfis familiares nil aliud aiebant, quàm eos non gustare. Periculum tertio facturus proficiscebar in Marianos hortos : demonstrabam topiarium, cœnacula, ambulationes, intercolumnia, vt cuncta conuestiret hedera : respondebant Germanico idiomate, qui viriditatem visere cuperet, iret in syluas, iret in nemora; quo audito, tuus hic nobilis, & prudens Sigismundus Thonus, quo non immerito à consiliis vteris; quid tu, aiebat, Rorari, inanem operam absumis?

duc amabo in campos : vbi plurimæ  
brassicæ satæ illius præsertim generis ;  
quæ multiplici folio in prægrandia ca-  
pita durantur , videbis mirandum in  
modum exhilarari , & laudare magis ,  
quàm quæ artis , & pretij , & amœnita-  
tis hætenus ostendisti. Et profectò sic  
se res habet , hi nostri vernaculæ linguæ  
Professores , legant quantumlibet La-  
tini sermonis eloquentissimos auctores ,  
non vident candorem , non aduertunt  
artem , non denique gustant nectaris il-  
lius suauitatem ; quam si qui modò gu-  
stant , qui paucissimi sunt , quia tamen  
ignorant ad vnguem

*Descriptas seruire vices , operumque co-  
lores ,*

vt ait Flaccus , & ad eloquentiam per-  
uenire desperant , malunt Latinæ linguæ  
hostes iudicari , dum tantulum nomen  
apud indoctum vulgus aucupentur ; non  
animaduertentes aureum eiusdem Poë-  
tæ consilium.

*Nec quia desperes inuicti membra Glico-  
nis ,*

*Nodosâ corpus nolis prohibere chiragrâ ,  
Est quoddam prodire tenius , si non datur  
vltimâ.*

Verum, næ ego bellus homo sum, qui prætermiſſis animalibus brutis, de quibus fuerat fermo; orationis neruôs in illos intendo, qui quandiu in ea ſententia obſtinati perſeuerant, brutiſſis animalibus deteriores ſunt. Oſtendamus (ſi placet) etiam ſenſibus à natura datis belluas hominibus præſtare: omittamus Aquilas, quas diximus Solis radios intueri: Quàm multa accipitrum genera ſunt altè cœlum petentium, vt oculorum aciem euadant, momentôque, & ictu penè oculi, ad quantulamcunque viſam prædam deuolant. Viennæ dederat in hoſpitiū mihi Melchenſis Abbatis ampliffimas ædes Ferdinandus Rex: quarum in poſtica horti, & porticus; vtebar æſtuo tempore pro cœnaculo porticu, quam hyeme aſſeribus claudi iubebam, Coruos ſagitta petiturus; ad id relicta rimula, quanta ſagittam caperet: in viridarij meditullio pōnebatur eſca, poſt primum primi diei iactum, Corui ſolliciti circumſpectantes veſcebantur, quaſi qui dicuntur Canes in Ægypto bibere; nunquam ſic inuiſus accedebam, vt tantulum momenti, ad emittendam

sagittam præiperem; visui, an odorati id ascribam, incertum habeo; canes certè, & aliæ quamplurimæ feræ, & ante omnes vultures sagaciùs odorant. Cervi acerrimi sunt auditûs, cùm aures arrexere, sicut & cùm demisere, penè surdi. Dabat hunc mihi ludum Episcopus Eystetensis; cùm apud eum diuertissem; Arcis turrim ascendebamus, ad sonitum tympani decurrebant Cervi, non illi quidem cicures, septisve inclusi, sed è sylvis acciti à quinto vsque lapide, deiiciebantur poma, rapæ, fasciculi fœni, ad cadentium strepitum pauidi fugiebant, percussio tympano reuertebantur: & erat animaduersione dignum, animal alioqui simplex, intelligere tympani sonitu ad cibum vocari, eodem iterato deponendi pauoris securitatem præberi. Quid tam naturæ cunctorum animantium auersum, quàm Talpæ? Solem odere, ac fugiunt, quo cætera oriuntur, & orta vegetantur; intra tamen terræ viscera condita, adeò denso, adeò surdo elemento aduersante, loquentium insuper vocem in sublime tendentem audiunt: & si quid de ipsis loquare, intel-

ligere dicuntur, & aufugere. Duobus ergo sensibus nos homines belluis præstabimus, præclaris nimirum, & præter cæteros expetendis; tactu, quoniam libido nobis solis hominibus per omnia membra data; & gustu: quando quæ tellus gignit, inexplibili gulæ non sufficiunt, nisi, quæ belluosus Oceanus fert, in eundem profundum, & insatiabilem gurgitem coniiciamus: at neutrius tamen laude belluas priuabimus, cum quæ sensus minùs participes sunt, Conchæ, ad tactum comprimantur; & reliquæ aliæ alia esca capiantur, eoque eligere, & aliam alteri anteponere norunt. Copiosè, inquit Cardinalis, ostendisti nil fermè in homine inueniri, quod non vel aliti, vel pisce, vel quadrupedi commune sit: vnum meâ sententiâ superest, quod in homine rarum, in belluis te nunquam inuenturum opinor; vt appetitui ratio imperet: hoc tam magnum, tam eximium, tam excellens est, solum vt hominem rationalem reddat: Quid enim præstabilius, ac laude dignius, quàm innumeris cupiditatibus à natura ingentis, quæ ad hoc, vel illud agendum impellunt;

temperare posse? & ut equum freno, sic furentem animum ratione cohibere? Indelebili vitio vertebatur Alexandro Macedoni, quod vinolentâ iracundiâ impulsus, non ab intima familiaritate iunctis manus abstinebat; concoctâque ebrietate, quæ admissæ cædis causa fuerat, vino nihilo minùs indulgebat, ut qui cæteris imperare cuperet, ipse sibi non posset imperare. Multa, inquam, huius præclaræ appetitui dominantis rationis indicia, belluis data, & à nobis dicta inuenies; quæ ne repetantur, clarius omnibus vnum adhuc exemplum adducam, si vera sunt, quæ Gregorius Bartholinus Vtinensis, vir fide dignus memorabat. Is referebat interfuisse sæpiùs Cardinali Sanseuerino, solitumque in aliqua saltûs parte confidere, & duos simul ab utroque latere Canes; transirent quantum vellent Lepores, Damæ, Cerui, Apri, perstitisse immobiles ambos, imperium domini præstolantes: altero citato nomine, & iussu feram sequi, non se loco mouisse alterum, iussionem & ipsum obseruantem: Potest homo ad aliquod vitium natura pronior impelli; quàm canis



ad persequendas feras gignitur? id illi proprium, id illi peculiare, ut visis feris se continere non queat; quos ergo non continuissent funes, non ferreae catenae; ratio continebat, nequid praeter domini voluntatem auderent. Adam, non tam singularis admirationis, paulò tamen minoris alterum. Purliliis exiguo, sed læto, & amœno oppidulo, secundo à Portu Naonis patria mea lapide, dominatur familia Comitum veteri maiorum nobilitate illustris; inter hos fuit Iulius Morandi filius, quem adolescentem fata præripuerunt; venationi deditus, inter canum turbam solutum ducebat lupum, qui non modò canes, quibus (ut antea diximus) à natura inimicantur, non offendeat; verum etiam vincat cum illis societate parilepores capiendi studio accendebatur. Ipse ego à Paulo tertio missus ad Ioannem, qui non æquo iure Vngariæ regnum sibi vindicauerat: vidi Budæ duos eius lupos colore nigerrimo, nullus ut pilus alterius coloris esset, catena iunctos, cætera liberos, sic inter homines, sic inter canes versari, quemadmodum videmus sagaces canes iun-

Quam binos incedere : & in his procul dubio , naturæ plusquàm sæuæ , ratio imperabat. Imitabimur bonum artificem , quamuis non affecuturi ; qui supremam operi manum impositurus , addit aliquid vltra quàm quod ab initio proposuerit : dixeramus , quæ hominis sunt , in belluis inueniri , non vniuersa in singulis , sicut nec in homine omnia : nunc aliquid maius addimus , aut omnia , aut eorum maximam partem , in vno , & quidem tantillo animante reperiri. Apium corpora carent omnibus , quibus cætera animalia constant : non neruos , non ossa , non spinas , non cartilaginem , non pingua , non carnes habent ; at habent animi dotes omnes , quas nos ipsi in nobis sæpe desideramus , sic simul degunt , sic imperant , sic obediunt , sic operantur , sic præuident , sic laborant , sic consulant : vt mores , prudentiam , virtutem , laborem , æquitatem , cuncta denique hominibus expetenda earum vita amplexetur : lucidissimum nimirum speculum proposuit diuina Maiestas , in quo intueremur quæ , & quanta in nobis esse deberent , quorum corpora , tan-

quam carinæ sensus inuehunt : quando  
intam paruo animali tot , tam eximia ,  
præclara , excelsa , modis omnibus op-  
tanda reperiuntur. Iamprimum sic vi-  
uunt , vt Rempubicam sine Rege , Re-  
gem sine Republica minimè probent :  
in quo videntur duorum principum  
philosophorum diuerfas sententias , sa-  
pientiùs illis , in vnam contulisse : Iuue-  
nem regem iuuenis turba comitatur ,  
grandæuum seniores ; quum verò pro-  
cedit , toto agmine popularis turba se-  
quitur , cingit , protegit , cerni non pa-  
titur ; qua in re omnem admirationem  
superat , vt vnaquæque proxima esse  
cupiat , & in officio conspici gaudeat :  
fessum humeris subleuant , validiùs fati-  
gatum portant ; vbicunque confede-  
rit , tota castra consistunt ; & si fortè ca-  
piatur , tenentur & ipsa , amisso dilabun-  
tur , & quia sine Rege esse non pos-  
sunt , ad alios migrant ; & defuncto mœ-  
rent , non cibos conuehunt , non pro-  
cedunt , tristi murmure circa corpus  
glomerantur , & , nisi abactâ multitu-  
dine subtrahatur , exanimem spectan-  
tes , luctum non minuunt : si plures na-  
scantur reges , quamuis inuitæ enecant ,

&amp;

& nascentium domos diruunt, nequando illorum causa nascantur factiones, quæ distrahant agmina; multò nobis Italici sapientiores, qui tot Regulis subiecti, exteris nationibus in nos audendi ansam damus; in reliquis nil nisi commune nouere, quem attulerint cibum, non separatim, sed simul vescuntur: maximè præuidentes, inæqualitatem cibi, inæqualitatem operis, & amissionem temporis secuturam: itaque edaces odio persequentes, proturbant; cùm terratum olim Principes non puduerit, Tiberium ad dignitatem, ad magistratus promouere, qui duos dies, totidèmq; noctes bibendo continuasset: Maximinum verò, qui Alexandro Mammeæ successit, non tam alios manducones, atque bibones spectare, quàm semet inexplebili ingluuiei addicere; quadraginta libras carnis, & (ut quidam) sexaginta cœnare solitum, amphoram vini bibere, toto interim sudante corpore, qui sudor colligeretur calice, impleueritque fœtidi Imperatoris, an suis? vno die collectus sextarios tres: edaciorem prope modum Albinum, qui Imperio poti-

tus est in Gallia, centum persica, denos  
pepones Hostienses, quingentas ficus  
passarias, quadringenta ostrea vna de-  
uorare cœna: & his humani generis op-  
probriis, & singularibus edacitatis  
monstris, quantumuis vorax, & insa-  
tiabile brutum nullum animal antepo-  
nemus; nec tamen est cur magnope-  
re miremur, cùm in utroque genere  
belluarum nulla sit, quæ expletâ satu-  
ritate cibum vlteriùs appetat; homi-  
num perpauci, quos non gula sæpiùs,  
quàm gladius conficiat. Summâ porrò  
æquitate diuisa inter se officia habent;  
aliæ stationes ad portas, & excubias a-  
gunt, adolescentiores aliæ flores defe-  
runt, aliæ venientes exonerant, aliæ  
cibum portant, aut aquam ore; senio-  
res intus operantur, struunt, poliunt,  
suggerunt: & quâ obsecro, prudentiâ  
opus conficiunt, binos circa singulos  
arcus limites linquentes, quibus alia  
exeant via, & ne ruat cera, pilis qui-  
busdam fulciunt, aditum ad sarcien-  
dum dimittentes. Rursus, ne prom-  
ptum sit, quod inuitet furem; tres pri-  
mos versus inanes struunt, reliquos à  
suspicionem remotos melle replent: quin

prius, quàm mellificare cœperint, amarioribus succis alucos illinunt, quasi testorio quodam aduersus cæterarum bestiarum auiditatem: singularique munditiâ moliuntur omnia, ne qua spurcities inter opera iaceat, & ne excrementorum causâ longiùs abeuntes, opera intermittant, in vnum congerunt, quæ turbidis diebus, & operis ocio egerant: tanta temporis parcitas! solus omnium immunis Rex, satellitum, atque liكتورum turbâ munitus, circuit opera exhortanti similis, cessantes castigat, non inertia solùm notâ, verùm etiam mortis pœnâ; non quòd aculeo vnquam vtatur, sed aliis imperat, solâ ipse maiestate verendus: fucos primos in opera impellit: qui sunt ab emeritis inchoatæ apes, & idcirco solæ aculeo carentes; his plebs pro seruis vtitur, tardantes sine vlla clementia punit, & cùm mella maturescere cœperint, tanquam ad mellificandum inutiles abigi iubet, multæque singulas aggressæ trucidant, non tamen maiori impietatis crimine, quàm M. ille Cato censurâ nobilis, qui seruum domi natum ad senium vergentem, vbi inutilis esse cœperat,

vendi præcipiebat ; aut nostræ ætatis Principes, qui, quorum fideli operavsi fuerint, infructuosos redditos fastidiunt, & ingrati abiiciunt; nam si largior mellis prouentus speretur, non modò non expellunt, verùm etiam alunt, domos illis ædificant, cæterum minimas, vt seruis, nam sibi satis decentes. Regibus amplas in parte aluei, & plusquam magnificas. Quàm prudens etiam illarum, quæ gerunt, consideratio; vt secundos capient flatus, & si procella cooriat, lapillos pedibus apprehendentes se librant: aut si vehementior ingruerit aura, abiectis floribus vt leuioribus, lapillos in humeros imponunt, consumptisque in proximo floribus, ad vltiora pabula speculatores mittunt. Quid cùm aduersperascit? vt minus, minusque strepunt: donec vna, ceu buccinâ canens circumuolet, quietem capere imperans, eodémque rursus gemino, aut triplici bombo à nocturna quiete ad diurnum laborem excitat. Quòd si venti aut imbres immineant; futuræ tempestatis præscia, se tectis continent: in expeditionem ituræ, noctu supinæ excubant, alas à

rore protegentes : ne in volatu deficiant : certandi quoque peritæ, deficiente cibo, necessitati consulturæ, in proximos alueos impetum faciunt ; illæ contrà dirigunt agmen ; instruuntque aduersas acies duo summi Imperatores. Age, quæ charitas inter ipsas ægrotantes ? nam, ne quid quod hominis sit, illis desit ; suapte natura sentiunt morbos, ante fores ad solis teporem promouent, promotis cibum ministrant, defunctas progerunt, funerantiùmque more exequias comitantur. Qui porrò probati mores ? redolentes vnguenta sic infestant, vt nihil magis, molliciem nimirum, atque luxuriam quorundam taxantes, quos nomine ciere pudet, pigetque ; qui si audissent saltem Triumuiros illos Romani nominis proscriptores, an proditores, L. Plotium absoluisse, L. Plotij bis Consulis, & Censoris fratrem, in Salernitana latebrâ vnguenti odore proditum, indignum iudicantes, in quem ciuili sanguine madentes aculeos stringerent, qui suo dedecore penitus periisset ; desinerent forsan alienam voluptatem tanti mercari. Singula si



ponderemus , haud ambigo , quin ut hominem paruum mundum , sic apem paruum hominem nuncupemus : immò aliquid homine maius , quando nullus adeò perfectus , in quem ad vnguem cadant , quæ de apibus retulimus : unde fit , ut minimè mirer fuisse , qui amore capti , integram ætatem illis vixerint. Et fuerat medius fidius hæc dixisse satis , ni verear dubitaturum te , eundem rationis intellectum reliquis insectis non itidem inesse : addam perpauca. Aduertisne quàm moderato vngue , quàm tenaci , & quàm æquali filo Aranea deducat stamina ? quâ arte scutulato rete celer pedicas ad captandas muscas ? demus hæc ( si placet ) naturæ ; demus , quemadmodum lanigeram ventris fecunditatem damus , sic cribratam pexitatem telæ , sic artis polituram , totam denique tenacis textrinx rationem ; latus afflatus ad non respuenda , quæ veniant , tum sinus prætentos , derelicto laxo summa parte , ut coniecere liceat : quæ difficilè cernuntur. Quantâ rursus architecturâ specus concameratio , & ut lineis offensæ muscæ præcipitentur in sinus : demus , si libet , naturæ

omnia, quæ sic agere docuerit: at non naturæ, sed rationis opus, præuidere futuros ventos, venturam hyemem: & parare, vt remotior sit à medio, sit villosior, atque fortior non modò irrupentibus ventis, sed etiam puluerum mole degrauante: quò rursus astu operatur, aliud agenti similis: vt intus sit, necne, cerni non possit, quum verò captum inciderit: quàm vigilans, ad prædam; licèt extrema hæreat plaga, semper in medium currit, vt concutiendo magis implicet. Quàm porrò indefessa fœmina; scissa protinus reficit, ad polituram sarcians; nam, ne fortè putes adhuc casu, non consilio hæc ab ipsis agi; scito, vt inter apes, sic inter araneas dispersita officia esse: primum omnium inter se coniugia ineunt; fœmina quæ minoris est audaciæ, domi residet, & (quod mulierum est proprium) telam texit: fortior, & audacior mas venatur, insidiatur, obtruncat, non minori spectaculo, præsertim, quum lacertarum catulos venantur, & inuoluentes tela vtraque labia mordicus apprehendunt; quàm quæ à cane aduersus leonem, & elephantum ausa

diximus. Meditare præterea quæ à natura dantur, doctore non indigere, ipsæ verò ut inter sese exerceant, & seniores iunioribus monstrent longitudinem filii inter duas arbores ducere à summo ad imum, & sæpiùs reducendo artem exercere; quòdque homini perdifficile, ut agnoscentes futura annuum incrementa, telas altiùs tollant, est operæ pretium advertere. Dant nimirum egregium documentum, cur non tantum nobis arrogemus, in plurimis virtutum operibus, adeò parvis animalibus cedentes; & his præcipuè, qui non regio sanguine sati, sed cæcutientis fortunæ suffragiis sublati, se terrenos deos esse putant, difficiles præbentes aditus; delicatas accommodantes aures, contumeliosa ingeminantes verba, & reliqua: quæ recordari, nedum recensere fugit animus: qui si meditentur secum qui sint, qui fuerint, agnoscent minimis omnium Formicis prudentiâ cedere; cum illæ cibos condant suæ duntaxat necessitati suffecturos: quando scilicet intemperie, atque sævitiâ hyemis, nullibi locorum reperiuntur: at hi opes emungunt, non necessitati consulturi, sed in-

explebilem avaritiam, quam extinguere non valent, expleturi. Iisdem Formicis animalia cuncta robore cedunt, onera grandiora quàm sint ipsæ trahentibus: in quibus condendis quàm ratione, quàm sapientia utantur, obsecro perpende; grana terræ credita, ne in segetem erumpant, arrodunt: duarum rerum gnaræ, facta oriri, & violata minimè renasci; sciunt & tertium, aqua mollita faciliè corrumpi; idcirco si imbre madefieri contingat, ad Solē summā diligentiam exponunt: Quid? quum maiora ad introitum diuidunt? qui labor, quæ sedulitas; & quoniam ex diverso conuehūnt, altera alterius ignara; quæ illa non naturæ instinctu, sed rationis intellectu data prudentia, ut certi dies veluti nundinæ, ad recognoscendum dentur, quod vnaquæque attulerit, & quæ tunc quàm diligens concursatio, & quædam cum obuiis collocutio, atque percontatio; filices mehercle earum itinere atteruntur: ne ambigamus quid qualibet in re possit quantulacunque sedulitas. In summa, ne vlla in re nobis cedat animatus puluisculus; sepulchræ etiam curam gerunt, videbísque defunctas, modò ab vna, modò à duabus

efferi ; quod honori , non necessitati  
tribui credendum. Ad hæc subridens  
Cardinalis , si tantum , inquit , rationis  
intellectum brutis animalibus largiris ,  
quid obstat , quin ( quod Plutarchus  
dubitat ) etiam Dei cognitionem con-  
cedas ? Non sum , inquam , adeò rerum  
imperitus , adeò mei ipsius ignarus ,  
quin non intelligam iocari te , non se-  
riò dicere : Largiar ego belluis , quod  
homini absque miserantis Dei gratia  
cognita est impossibile ? declarant hoc  
tot summorum alioqui sapientum de-  
lirantes sententiæ , quibus quanto sa-  
pientior Simonides , qui ab Hierone  
interrogatus quid esset Deus , diem de-  
liberandi postulavit , postridie quæsi-  
tus , biduum petiuit , cùmque dierum  
sæpiùs duplicaret numerum , admi-  
ranti , & causam quærenti Hieroni re-  
spondisse fertur : quia quanto magis  
considero , tanto res obscurior videtur.  
Sapientissimè quidem , non enim hu-  
mana paruitas ad illam excelsam Ma-  
iestatem accedere valet , sui solius in-  
genij viribus freta , quanto minus bel-  
luina : veruntamen aliud est cogno-  
scere , aliud sentire : sentiunt etiam ina-

animata sibi aduersantia , vt ignem , ligna , & contrahuntur : sentiunt fata , vt brassicas , vites , & recedunt : sentiunt pari modo propitia , & amplexantur ; non agnoscunt Deum animalia bruta : at sentiunt esse , & contremiscunt , eique benedicere trium puerorum cantico iubentur ; cui sententiæ sic astipulor , vt doctiorum opinionem sequar. Tradit Hieronymus , sacer , nedum probatus auctor , properanti ad Paulum Eremitam Antonio , inter saxosam vallem occurrisse homunculum aduncis naribus , cornuta fronte , cuius extrema pars corporis in caprarum pedes desineret , palmarumque fructus ad viaticum obtulisse : sciscitanti quis esset , respondisse vnum ex accolis eremi , quos errore delusa mortalitas Faunos , Satyrósque vocans veneraretur : gregis sui legatione fungi , rogare , vt pro se communem Deum deprecaretur , quem pro salute mundi venisse cognouissent ; non hic inter homines magis numerabitur , quàm illa hominum effigies , & imitatrix Simia , & Deum tamen esse non solùm sentiebat , verùm etiàm quòd foret humanitatem indutus , ag-

noscere videbatur : nisi fortè in solamen , id beato seni optimus , & clementissimus Deus dederit , quod insequentibus fecisse clariùs constat. Si quidem defuncto Paulo , assidenti Antonio , & mœrenti quòd non ad fodiendum cadaueri sepulturam , aliquid haberet , ex interiori eremi parte aduenisse duos leones , qui scalperent humum ungulis ; mox effossa cadaueris capaci fossa , ad Antonium perrexisse , aurium , & caudæ blando motu manus , pedesque lingentes ; quibus benedictionem à se postulare animaduertentem , Deo deuotum senem in Christi laudem effusum , quòd muta quoque animalia Deum esse sentirent , dixisse ; Domine , sine cuius nutu ne folium quidem arbori defluit : da illis , sicut tu scis ; & manu , vt abirent , imperasse. Cernis sanctissimorum hominum testimoniis animalia bruta Deum esse sentire , quod & antè Esaias , diuino afflatus spiritu dixerat ; non tamen Antonius benedixit , gnarus non egere benedictione , sed da illis , ait , sicut tu nosti. Video me amplum æquor ingredi , & confido diuinâ afflante aurâ , in salutis portum

euasurum. Elephantorum greges perhibentur in Mauritanix saltibus ad Anulum amnem descendere, noua crescente Luna, & aquâ resperfos salutato sydere in sua reuerti. Quid aliud dicere possumus, quàm Elefantos, qui rationis intellectu, consensu omnium, homini proximè accedunt, sub illius syderis cultu Deum omnium opificem venerari? quippe qui non id confuso dierum ordine faciunt, sed nouâ tantùm Lunâ, veluti tunc à Deo missâ; neque verò salutare audent sordibus inquinati, quales nos homines: qui flagitiis obruti, homicidiis cruenti, omnis generis scelerum spurcitie fœdi, omnipotentis Dei templa ingredimur. Attende & hunc per aquam purificandi ritum, quo Deo Creatori nostro coniungimur; diuinam bonitatem sic mentibus nostris infudisse, naturæ quodam instinctu, ut nulla tam barbara gens sit, tam idolis dedita, tam veræ religionis inimica, quæ non crediderit aquæ aspersione à criminum nexibus liberari.

*Tu genitor cape sacra manu, patriosque  
penates*



*Me bello è tanta digressum, & cede re-  
centi,*

*Attrectare nefas : donec me flumine viuo  
Abluero.*

Hæc dicendi mihi, & Cardinali forsan  
audiendi fesso, finem fecerunt allatæ  
litteræ eorum, quæ iam tum in Cæsarem  
moliebatur Gallorum Rex. Et  
quoniam alia ex aliis ferendo, non am-  
plius in illos de belluis sermones reci-  
dimus; non multoque post vir ille, ob  
eximiam probitatem immortalitate di-  
gnus, extinctus est; totque & talia se-  
cuta sunt, quæ terram, mare, cælum  
confunderent, approbaréntque opi-  
nionem meam, sæpe animalia bruta  
ratione uti melius homine: libet non-  
nulla, quæ in tali re dicenda supere-  
rant, tecum potissimum differere, Il-  
lustrissime Princeps, qui prudentia, &  
probitate Auunculo quondam tuo par,  
eruditione, reliquarumque virtutum  
in Principe expetendarum splendore  
sic radias, ut qui te in Cardinalem e-  
legit: consuluisse dici possit nauiculæ  
Petri; inter procellas, naufragium sub-  
ituræ, nisi tui similium ope, in salutis  
portum deducatur. L. Apuleius vn-

guento magico delibutus, nequiens humanam formam recipere, nisi roseâ coronâ è Sacerdotis manu decerptâ, septies antè mergit flumini caput, Pythagoricum dogma secutus. Nata in Sabinis boue eximiâ magnitudine, & specie, cecinerant vates cuius urbis ciues eam Dianæ immolassent, ibi imperium fore, peruenerat ad Antistitem Dianæ fatidicum carmen; quare ductâ ad sacrificium boue, quid, ait Romanus, paras incestum sacrificium Dianæ facere? quin viuo prius perfunderis flumine. Vides veram lucem in tenebris luxisse, coactosque malos Dæmones vellent nollent, futuri baptismatis gratiam nunciare: vnde ex poëtis, qui diuino (vt ait Plato) furore correpti, ventura sæpe vaticinantur.

*O nimium faciles: qui tristia crimina  
cedis*

*Tolli flumineâ posse putatis aquâ.*

Videlicet monens, alia nos quàm pura fluminis aquâ egere. Quòd si mali Dæmones omnium, quæ à Deo creata sunt, infelicissimi, atque miserrimi, hoc diuinâ cogente Maiestate docuere; cur mirabimur à belluis documentum sum-

prum? Operatur multa optimi Dei clementia ad vsum, & futuram salutem nostram: quid enim fluminis ablutione indigent Elephanti; quorum animæ cum corpore pariter intereunt? Idem (si quæris) de duobus equis fatebor, quorum, pietatem erga matrem, & matris erga filium verecundiam in damnato coitu fugiendo, viuenti Auunculo tuo exposui; non enim dicam conscientiaë stimulis agitados, se pessunduisse, sed interfuisse aliquem, qui abominandum incestum aut admisit, aut admittere gestierit, detertere voluisse Deum à tanto scelere, vt secum ipse meditaretur, si tanta pudoris, tanta conscientiaë patrati criminis vis inesset brutis animalibus: quid sibi homini faciundum foret. Eadem ratione docuere Elephanti, quanta religio iureiurando insit: quando nulla alia vi ad transfretandum cogi possunt. Quid? cum moles illas infestant morbi, & supini per herbas suspiciunt cœlum: nonne sentiunt Deum esse? nosque morient, vt ægritudine capti, aut aliâ calamitate oppressi, Deum vt nos liberet, precemur. In Ægypto iuxta Copton  
oppi-

oppidum, initio veris Hirundines mun-  
niunt insulam Ifidi dicatam, ne laceret  
fluuius; paleæque & stramine firmant  
continuatis per triduum noctibus, tan-  
to labore, ut multas in opere mori con-  
stet, eaque militia illis cum anno redit:  
an censes aliud agere, quàm ut nos do-  
ceant quâ cura, quo studio nobis sit in-  
uigilandum, ut delubra Deo condamus?  
& condita seruemus? Huic virtuti pro-  
xima est innocentia, & quæ in homine  
tanta, quanta in Vulture? nihil vesci-  
tur ex iis, quæ ferunt homines, aut plan-  
tant, aut alunt: nihil prorsus lædit, ne-  
dum interficit, solis ex cadaueribus es-  
cam sibi quærit: Cui volucris, qui cum  
Pythagora insaniunt, doctoris sui ani-  
mam infusam credere possunt, quan-  
do id erat sapientiæ principium ani-  
mantibus parcere, tot alios cibos tel-  
lure nobis suggerente: Adde (quod est  
summi philosophi) diuinationem vo-  
lucris daram, ut biduo atque triduo an-  
tè volet, ubi cadauera futura sint. In-  
nocentiæ veluti magister est metus  
pœnæ. Solent in Africa crucifigere leo-  
nes, si qui deprehendantur vrbes ob-  
sidere, quod in senectâ faciunt: quo-

niam ad persequendas feras vires non suppetunt; cuius pœnæ metu, licet urgeat fames, desinunt: & nos ab Agrippina Colonia Duram versus equitantes, in illa vasta sylva, vidimus duos caligatos lupos, non secus quàm duos latrones furcæ suspensos: quo similis pœnæ formidine à maleficio reliqui deterreantur. At inter homines quotidie reperiuntur, quibus ob admissa furta tergo virgis cæsum, abscissæ auriculæ, signatæ genæ, truncata altera manus, erutus oculus, nec adhuc à furtis se continere possunt, donec laqueus vitæ finis extiterit. Verumenimvero quid de his plura congerere opus? eruditi Ægyptij non temerè omne ferme bestiarum genus consecrauerunt, non omnino vano consilio perpendentes, quantum nos homines belluis debeamus, quæ earum rerum quibus vitæ nostræ cursus indiget, inuentrices fuere. Estne quicquam iucundius, aut utilius, vel diligentiore studio magis curandum, quàm salubritas corporis? venam tundere monstravit Hippopotamus, assiduâ quippe satietate obesus, in litus egreditur, & fractarum

arundinum acumina specularis, acutissimo cuique stipiti corpus imprimit, venam quandam in cruce vulnerans: quam exonerato sanguinis profluuiio corpore, limo obducit. Vrsi, quum eorum oculi hebetantur, fauos expetunt, vt vulnerati ab opibus oris exhaustus sanguis, leuet oculorum grauedinem. Canes, quum languentem stomachum sentiunt, gramen vorant, quo vomitu excito ab ea se nausea liberent. Hirundines notabili munditiâ egerentes pullorum excrementa, adultiores circumagi docent, & foràs saturitatem emittere. Clysteriis vti docuit Ibis in Ægypto, in orbe nostro Ciconia, per posticum rostro ventrem proluendo: ad laxandos ventres herbam Aron monstrauere Vrsi: at Seselium Ceruæ, qua faciliore partu vterentur: Hirundines ostenderunt Chelidonium visui saluberrimam. Neque verò miremur tot & talia à belluis didicisse, cum ipsæ belluæ in medendo sibi peritiores sæpenumero sint, quàm qui inter nos medendi artem profitentur. Vulnerati Cerui pastu Dictamni sagittas eiiciunt: iidem percussi à Phalangio

cancros edendo sibi auxiliantur : Testu-  
do cunila vires aduersùs serpentes refo-  
uet: Mustella in dimicatione cum muri-  
bus, rutâ vtitur: Ciconia Origano; hede-  
ra Apri, & cancris præcipuè mari eiectis;  
in morbis sibi medentur: Angues hyber-  
no situ obductam corpori membranam  
fœniculo exuunt, nitidique vernant: ii-  
dem hybernâ latebrâ obscurato visu ma-  
rathro oculos inungunt: Draco vernam  
nauseam syluestris lactucæ succo restrin-  
git: Panthera aduersùs aconitum, quo  
sagittis inunctis barbari venantur, homi-  
nis excrementis opitulatur sibi: Elephas  
Chamæleonte imprudenter deuorato,  
quia frondis concolor fit, occurrit olea-  
stro: Vrsi quum Mandragoræ mala de-  
gustauere, formicas lambunt: Cerui her-  
ba Cinara venenatis pabulis resistunt,  
occisóque Chamæleonte, qui etiam vi-  
ctori nocet, lauro virus extinguunt: Pa-  
lumbes, graculi, merulæ, perdices lauro  
purgant annum fastidium: Columbæ,  
turtures, gallinacei helxine herba: Ana-  
tes, cætereque aquaticæ syderite: Grues  
pallustri iunco; hæc (si placet) naturæ  
munera non agnoscimus ipsi nisi ab illis  
longa experientia edocti. Ars medendi,

cui vitæ nostræ salus innititur, ex agnitione Simplicium & Lunæ statu procul dubio pendet. Hanc vtrunque disciplinam paruipendunt egregij seculi nostri Medici; quin sic contemnunt auiditate lucri, & in ægritudines nostras grassandi potius, quàm consulendi studio, dum nulla lex punit homicidam medicum: vt asserere possim audisse me, qui se aliquid in hac arte esse putarent, de plenilunio futuro differentes postridie quàm sydus coiisset. Simplicium verò scientiam sic abieccere; vt non modò, quæ animalia bruta docuerunt, ignorent; verùm etiam totam relinquant Pharmacopolis, indoctissimo nempe hominum generi: qui quicquid somniauerint, pro comperto habent. Muliercularum insuper (si Deo placet) imperitiam per maiorum os traditam sequentes, nostris nimirum periculis discunt, pèrque nostras mortes agunt experimenta, & nos interim meritò plectimur; dum indoctissimo cuique medicum se profitenti extemplo credimus. Quas per Deum immortalem gratias habet vita vestra, Andreæ Mathiolo Senensi, qui Cornicum, quod aiunt, oculos transfixit do-



Altissimo illo opere, quod tibi, nomini-  
que tuo dicatum in Dioscoridem edi-  
dit; effecit profecto ut medicos impe-  
ritiæ suæ pudeat, pigeâtque, Pharma-  
copolas temerarij ausus miscendi ex  
ignotis, & sæpenumero ex contrariis,  
quæ in iugulum nostrum redundant.  
Sunt & in his tempestatum aërisque  
præfagia; quæ non à nobis bellæ, sed  
nos à belluis didicimus: Delphini tran-  
quillo mari lasciuentes ventum ex qua  
venturus sit parte portendunt. Con-  
chæ adhærescentes, loligines volitantes,  
echini affligentes sese, aut arena fa-  
burrantes, mergi maria, & stagna fu-  
gientes, grues in mediterranea festi-  
nantes, futuram tempestatem denun-  
ciant: ranæ ultra solitum vocales, fuli-  
cæ matutino clangore strepentes, mer-  
gi, anates pennas rostro purgantes,  
ventum portendunt: idem Corui sin-  
gultu quodam latrantes, seque concu-  
rientes, si continuabunt; quod si re-  
forbuerint, ventosum imbrem; Gracu-  
li à pabulo sero recedentes hyemem,  
& albæ aues quum congregabuntur, &  
quum terrestres volucres contra aquam  
clangores dabunt, perfundentes sese,

& præcipuè cornix, atque hirundo iuxta aquam volitans; quæque in arboribus habitant, in suos nidos fugientes, anseres intempestiuo clangore, ardea in media arena tristis. Neque verò tempestatem tantum, sed etiam futuram serenitatem prævident: quemadmodum Delphini aquam spargentes, atque turbantes, Grues per sublime volantes, & aliæ aues: quas persequi immensi est operis. Neque rursus aues tantum, verum etiam quadrupedes aëris mutationem præfagiunt: exultantes, & indecora lascivia ludentes pecudes; cœlum olfactantes boues, sæque assidue lambentes; quid amplius quaerimus? immundi fues manipulos fœni lacerantes; formicæ segniter, & contra solitam industriam clandestinè concursantes, aut progerentes oua; vermes denique terreni erumpentes. Quis hanc obsecro, cœli observationem, ventorum, imbrium, serenitatis præfagia naturali instinctu fieri dicat? cum videat non eadem via incedere omnia, sed alia aliis data, ut sunt, quæ studio, & doctrina comparantur. Adde quod norunt aduersus ea sibi consulere. Mures.

venturam ruinam prævidentes demigrant; Sciuri qua spiraturus est ventus, cauernam obturant, & alia ex parte aditum aperiunt; hi nostri nocturni vigilantes Gallinacei, nonne syderum gnariter nas interdiu distinguunt horas? quare minimè mirum, si diuini prorsus homines illi Cœli interpretes, & rerum naturæ capaces, astris ipsis belluarum nomina imposuerunt, Arictem, Taurum, Cancrum, Leonem, Scorpionem, Capricornum, Pisces vocitando. Neque rursus mirandum, si stellarum cursus peritæ, magicis etiam artibus pollere belluæ quædam traduntur; Hyæna quodcumq; lustrauerit animal, è vestigio hæret; Picus Martius clauum vel cuneum quanta libuerit vi adauctum arbori, in qua nidificauerit, quum primùm infederit, magno cum arboris crepitu eximit: sunt, qui hoc ignoto gramine ascribant, vtrumuis fuerit, admiratione dignum hoc præscire, & intelligere auem: sapit porrò nescio quid magicæ, quod gallinæ faciunt, quum ouo edito inhorrescentes se concutiunt, & circumactæ purificant se & oua festuca lustrant. Nauigandi porrò peritiam, quæ

ab astris pendet, siue remis, siue linteo,  
ostendit Nauplius animal sepia haud  
dissimile; tranquillo mari se in con-  
cham condit, acatij modo carinatum  
inflexa puppe, rostrata prora, palmulis,  
vt remis æquor feriens, & si inuitet aurâ,  
easdem in vsum gubernaculi porrigens,  
nulla alia societatis ratione, quàm vo-  
luptatis, vt vehat illa, hic vt vehatur;  
ludos nempe sibi facientes ex stultis, &  
periculosus vitæ nostræ desideriis; nam  
gubernandi artem docuere miluij cau-  
dæ flexibus aëra fulcantes; nauium mo-  
les ne in latus inclinent, monstrauere  
grues atque ciconiæ, transuolaturæ  
pontum saburra, aut alio onere se li-  
brantes: eadem grues ductandi exerci-  
tus magistræ fuere, eligunt ducem,  
quem sequantur, altè volant ad prospi-  
ciendum, pèrque vices dispositos ha-  
bent in extremo agmine, qui accla-  
ment, & qui gregem voce contineant:  
excubias seruant nocturnis tempori-  
bus, vigilēs lapillum pede sustinent, vt  
si fortè somno lassatis deciderit, exci-  
tentur: Ciconiæ seuerioris disciplinæ  
magistræ, quum in vnum crepitantes  
congregantur, quæ nouissimè aduene-

rit, eius damnata segnitie communi  
consensu lacerant: excitari buccina do-  
cuerunt apes: quanquam tota earum  
vita multiplex & varia vitæ nostræ in-  
structio existit: Olissyponensium quo-  
que legatio ad id missa, Tiberio Cæ-  
sari nunciauit auditum Tritonem con-  
cha canere. Duci obtemperandi innu-  
mera sunt exempla, quorum aliqua re-  
citata non opus est repetere; aduersus  
hostem armari docuerunt Ichneumo-  
nes, & Apri; illi cum serpentibus dimi-  
caturi, se limo sæpiùs inuoluentes,  
Sole siccantes, pluribûsque coriis se  
munientes; hi libidine stimulante, li-  
mo pariter, & arborum attritu tergus  
durantes; insidias struere, Hyæna, Cro-  
cuta, Mantichora, vulpes, feles; de-  
bitum vltionis modum non excedere,  
leones: qui vulnus intulerit, corre-  
ptum lacerant: qui sine vulnere percus-  
serit, duntaxat sternunt: si ad vlciscen-  
dum vires non suppetant, irrisum ini-  
micum dimittere docuit Anthus, quæ  
parua auis equorum interuentu à pa-  
bulo pulsa, eorum hinnitus imitata,  
ceu deridens abit: venturæ senectutis  
& futuræ necessitatis admonent formi-



cæ incredibili sedulitate condentes æ-  
 state, quæ sufficiant hyeme: vt sene-  
 ctutem veneremur, Elephanti monuere  
 seniorelem eligentes, qui agmen ducat,  
 ætate proximum, qui claudat: vt mu-  
 lieres castitatem colant, turtures, co-  
 lumbæ, cornices: vt verò domestica  
 curent, viri ad bella, ad negocia pro-  
 deant, araneæ: mutux societatis mo-  
 nuere pinna & squilla communicato  
 consilio pisciculos venantes: cum ex-  
 ternis etiam conuenire, Delphini, præ-  
 cipuè in Narbonensi prouincia, & Ne-  
 mausensi stagno, aduentante mugilum  
 turba, cum incolis societate inita: ope-  
 rariis debitam mercedem soluere, lu-  
 pi pisces apud Mæotidem, qui nisi ius-  
 tam portionem à piscatoribus accepe-  
 rint, expansa lacerant retia. Ac ne quæ  
 in homine reperiuntur, singula belluis  
 accepta referamus: docuerunt, si inter  
 nos dissenserimus, vt sunt mobiles, va-  
 rij, & nunquam suo contenti humani  
 animi, odia deponere, concordiam in-  
 re, & se inuicem tueri: ne à fortioribus  
 opprimamur: & videmus turpissimos, ab  
 omni que prudentiæ sensu reliquis bru-  
 tis alieniores fues, qua charitate, quo

feruore ad opitulandum sibi conueniant, vnus si grunnitum audierint, factò repentè globo in auxilium vnanimè currunt; confer, quæso, nos homines cum brutis animalibus; & postquam sic lubet, cum suis brutis. Obiit Maximilianus Cæsar, qui non paternis nec auitis opibus, sed propria virtute pondus & Maiestatem Romani Imperij sustinuit. Surrexit extemplo

\* \* \* \* \*

\* \* \* \* \*

Verùm qui habitat in cælis irridebit eos, & si non sanauerit dissipabit eos. Nos autem gloriemur in hoc Pontifice Paulo III. cui Deus mentem aperuit, ut ea optaret quæ Reipublicæ eius salutaria futura sunt. gloriemur in hoc Cæsare, sub cuius Imperio sperare possumus propediem cernere Turcam victum, profligatum, occisione occisum. Gloriemur denique, qui sub florente Republica Veneta, nullius liuoris, nullius diffensionis conscia ardente reliqua Italia bello securi coniugum, liberorum, fortunarum nostrarum læti vivere possumus. Datum in Portu Nao-  
nis Calend. Augusti MDXLIIII.

---

TYPOGRAPHVS  
LECTORI.


**V**OTI mei fuisset Libellum hunc  
minimè in lucem emittere, nisi  
Notis illustratum, quas in ipsum pene  
confectas habebat clarissimus Nau-  
daus. Verùm quoniam propter suum  
in Italiam discessum, absoluerè illas  
tempestiuè non potuit, ut primæ istius  
editioni inservirent, cauebo imposterum,  
ne si denuò recudatur, commentariis  
illis apprimè doctis & elaboratis desti-  
tuare.



THE [illegible] OF [illegible]

BY [illegible]

—











BIBL  
VII

X